

# NSUNGI YA DIBUUNDU

## YA EPHÈSE



Mfumuna sakumuna beno.

Ya kele na muntu na kati awa yina ke na kunataka ditoma Dodge, Dodge ya malu-malu, na numelo WX-2129, yina ba me bumbisa na lweka yankaka ya bala-bala kuna? Yandi me bika minda ya yawu ya kupelisa, minda ya mantwala mpe nyonso, ya kupelisa. Mpe kana ya kele na muntu yango yina ke na kunataka ditoma yina, ti, beno basika na malembe mpe beno kwenda kufwa minda ya beno. Ya kele kaka na bala-bala na lweka ya diboko ya kikento, kaka na Bala-bala ya Nana. Mu banza ya kele numelo ya New Albany, WX-2129. Ditoma Dodge ya mbwaki, ditoma Dodge ya malu-malu, ya lenda vwanda ya mvula 1959, 1960, to kisika mosi na kati kuna. Mpe mu vwandaka zaba ve kana ya vwandaka muntu na kati awa to muntu kaka . . . na kisika yankaka. Mbote mingi, ya vwandaka. Mpe na yawu ya kele kima ya mbote. Ntangu yayi, mu ke tuba ve ti kaka bamama ke zimbanaka yawu, samu ti munu mpe ke salaka.

<sup>2</sup> Mbote, ya kele kieleka mbote na kuvutuka dyaka na nkokila yayi na lukutakanu, mpe na kuzwa ntangu ya mbote yayi na kubundana kintwadi na kizunga ya Ndinga. Beno ke na kusepelaka na Yawu? [Dibuundu me tuba, “Amen.”—Mu.] Oh, ya kele kieleka, beto ke na kuzwaka kaka ntangu mosi ya mbote, ya mbote. Mpe ntangu yayi beto ke sala kivuvu ti Nzambi ke sadisa beto na kulandila.

<sup>3</sup> Ntangu yayi, mpangi ya munu ya bakala me kwenda mpe me kuzwa tablo awa, kasi ya kele—ya kele nkufi mingi, ya ke kuma kaka zulu mingi ve. Na yawu mbasi, mbote, mu ke meka na kukanga yawu na zulu awa, kulelika yawu na zulu mpe kusala yawu samu . . . Mu ke zola kubasisa mwa bima yina mu ke zola kubangula, samu beno lenda kaka . . . mpe kaka samu beno vwanda ya kundima ti kieleka beno me bakula Yawu.

<sup>4</sup> Ya vwandaka . . . Nkokila me luta, to mazono ya vwandaka, mwana ya munu ya fyoti ya kento, Sarah, ya vwandaka mwa kitoko. Mama mpe munu vwandaka tala na mwa mukanda ya yandi; yandi vwandaka baka banote. Mpe yandi vwandaka na nyonso ya kusonama kaka mbote, Ésaïe mpe Matthieu mpe nyonso. Mpe kaka na nsuka ya mukanda, yandi tulaka “Mpe—mpe lufwa . . . Ntoni kele dyaka ve na lunungu na yawu, mpe lufwa ba me katula ntunga ya yawu.” Yandi me kuma na bamvula pene sambwadi. Mpe kuna yandi na kisika ya kutula “Apocalypse,” yandi tubaka, “Buku ya ba-révolution.” Mbote,

yina ke talisa ti ba zola kumeka kusonika kima, na mutindu nyonso, mutindu yina ve? Mu banza mwana ya fyoti ya kento ya Mpangi Collins, yandi kele ya kuvwanda kuna na manima, mpe bawu sonikaka (“Révolution”?), “Bilumbu ya ba-révolution,” tubaka Mpangi Neville. Yandi me vukisa ntima na yandi. Mu banza ti beto nyonso fwana sala yawu.

<sup>5</sup> Mbote, beto kieleka ke na kuzwaka ntangu mosi ya nene. Oh, Mfumu ke na kusakumunaka. Mu kotaka na kutanga na suka yayi, na kivinga, kaka mbala mosi na manima mu me bika bana na lukolo, mpe mu me basika kaka ntama mingi ve; mu vwandaka me kuzwa kaka ntangu mosi ya mbote. Mpimpa ya mazono, mu tangaka mpe, mutindu ntama na kati ya mpimpa.

<sup>6</sup> Mpe pene ya ngunga zole na ndambu na suka bantu mosi katukaka na node kwizaka, bawu kuzwaka beto. . . vumbulaka munu samu na kusambila samu na mwana mosi ya fyoti ya kento yina vwanda kufwa. Mpe mu ke na kivuvu ti Mfumu ke kumisa yandi mbote. Bawu kwizaka kaka, nzila nyonso katuka Bedford, na Indiana, samu na kulomba ndombolo ti ba sambila samu na mwana ya fyoti ya kento kuna. Bantu zole vwandaka na lukutakanu mazono na nkokila mpe bawu tambulaka na ditoma nzila nyonso kuna, na manima nzila nyonso na kuvutukaka, mpe nzila nyonso na kuvutukaka dyaka. Kukondwa ntembe bawu tambulaka mpimpa nyonso na kunataka ditoma. Mpe na yawu, ya kele mbote na kuzaba ti bantu kele na kivuvu ya mutindu yina mpe ke kwikila Nzambi.

<sup>7</sup> Oh, ya kele na kilumbu ya nene ti beto ke na kuzingila. Mpe beto ke na kuvingilaka ntangu yayi, na bansungi ya dibuundu yayi, na kuzwa kaka ya kulutila mpe ya kulutila.

<sup>8</sup> Ntangu yayi beto ke na kumekaka na kubanda kaka na ntangu ya mbote nkokila nyonso, samu beto basika na ntangu ya mbote. Beno me zola yawu mbote? Mpe yina ke sala bantu yina fwana sala, kukuma na yinzo samu bawu kwenda na kisalu. Mazono na nkokila beto basikaka pene ya baminuti tanu, kumi na manima ya ngunga ya yivwa, to na kutala mu manisaka. Mpe na yawu beto kele na kyese na kuzwa milongi nyonso yina me kwiza tala beto na nkokila yayi. Mpe mu—mu. . . Mpangi Junior Jackson, Mpangi Carpenter, mpe mpangi ya bakala ya dibuundu kuna, mpe mingi yankaka na zulu ya estrade awa mpe na lukutakanu.

<sup>9</sup> Mpe ba vwandaka me tuba na munu bubu yayi ti mpangi mosi ya munu ya ntalu mingi yina vwandaka na munu na kumwangisa nsangu, Mpangi ya bakala mpe Mpangi ya kento Andrew katuka nzila tii na kati-kati ya Chine, vwandaka na lukutakanu mazono na nkokila. Wapi mutindu ya ntangu ya mbote beto kuzwaka kintwadi kuna na Jamaïque mvula me luta yayi. Beto kuzwaka ntangu ya nene, mu vwandaka na yinzo ya bawu. Mpe oh, kana. . . Mu ke kumiyufula kana

Mpangi ya bakala mpe Mpangi ya kento Andrew kele awa na nkokila yayi awa na—na lukutakanu? Yinzo yayi kele kaka ve ya kutunga mbote, na yawu. . . Yinga, bawu kele ya kuvwanda na manima kuna. Beno ke zola kaka kutelama, Mpangi ya bakala mpe Mpangi ya kento Andrew, mwa ntangu fyoti. Mfumu kusakumunu beno. Beto kele na kyese mingi na kumona beno, Mpangi ya bakala mpe Mpangi ya kento Andrew. Mu lombaka bawu na kukwiza mvula me luta ntangu mu vwandaka kuna.

<sup>10</sup> Ntangu yayi, mu ke tuba yawu ve na ntwala ya bawu (Mu zolaka tuba mingi, kasi mu ke tuba yawu ve ntangu yayi), kasi bawu kele yina mu ke bokilaka ba-missionaire ya kieleka. Kana bawu kwiza mbasi na nkokila, mu ke kuzwa bawu na kuzonza awa kaka ntete beto banda na kuzonza. Mu ke zola beno kuwa yina kieleka zola kutuba bilanga ya kumwangisa nsangu, ntangu bawu vwandaka ntama na kati mingi tii ntangu bawu kuzwaka ata kima mosi ya. . . Mbote, bawu kele. . . Mu banza ya vwandaka bamvula mpe bamvula mpe bamvula ti bawu vwandaka ntama kuna, mpe bawu ata mbala mosi ve na mutindu mosi monaka tomabilu to masini, to kima mosi yankaka, bamvula mpe bamvula. Mpe mutindu Mpangi ya kento zolaka sala dimpa ya bawu na kubakaka. . . Mutindu yandi zolaka tuta yawu. Mpe. . . Ntangu yayi, yina kele kieleka ki-missionaire. Mpangi ya bakala Andrew vwandaka na ntunga mosi mpe nsinga mpe yandi vwandaka dokotolo, yandi vwandaka tunga bawu nyonso ntangu bawu vwandaka lwala. Mpe mu banza ntangu mwana. . . bana vwandaka kwiza, Mpangi ya kento Andrew vwandaka kukondwa ntembe kibusisi mpe Mpangi ya bakala Andrew dokotolo. Bawu vwandaka tala kaka na bawu.

<sup>11</sup> Mpe kuna ntangu bakuluntu ya bisalu ya kumwangisa nsangu ya. . . na Angleterre, bakuluntu ya Bisalu ya kumwangisa nsangu ya Pantekote na Angleterre, tubaka ti bawu vwandaka “ya kukula mingi samu na kuvutuka na bilanga ya kumwangisa nsangu,” (Mu ke tuba kaka na beno wapi mutindu ba-missionaire bawu kele, bawu vwandaka kwenda baka kiti mpamba ve mpe kuvwanda) bawu vutukaka kaka bawu mosi, ntama na Jamaïque mpe kuna ke na kumwangisaka nsangu ntangu yayi. Mpangi Fred Sothmann mpe munu awa kuzwaka bweso ya kukwenda na yinzo ya bawu mpe talaka bawu, mpe wapi mutindu ya ntangu ya luzolo bawu talisaka beto; mutindu—mutindu ya mbote mutindu Miklisto zolaka vwanda. Mpe mu ke tuba na beno, mu ke tuba yayi ve samu. . . Mu ke zola mingi kupesa mwa bouton de rose ntangu yayi ti yimpu na manima bawu me kufwa. Mu ke tuba na beno, bawu kele Miklisto ya kieleka. Mpe mu tubaka na kento ya munu ti Mpangi ya kento Andrew vwandaka mosi ya bakento ya Miklisto ya mbote, ya mbote mingi yina muntu lendaka kuzwa. Yandi kele kaka. . . nkadulu ya yandi kele ya kusala na kati ya Klisto, mpe; mpe

Mpangi Andrew, mpe. Na yawu, mu ke ndima ti kana beno nyonso me mona bawu bawu yina vwandaka me telama kaka, mu vwandaka zola ti dibuundu yayi kupesa bawu mbote mpe kuwa bawu ntete bawu kukwenda.

<sup>12</sup> Ntangu yayi, mbasi, kana Mfumu zola, oh, beto ke . . . mbasi na nkokila beto ke banda na nsungi ya dibuundu ya zole yayi. Na nkokila yayi beto ke banda na nsungi ya dibuundu ya ntete. Mu ke kwikila ti Mfumu kele na lusakumunu na kibumbulu samu na beto.

<sup>13</sup> Mpe beno bambuka moyo, mutindu mu tubaka ntete, bantangu yankaka na bima yayi beto lendaka vwanda dibanza mosi ve na zulu ya yawu landila mutindu—mutindu théologie ke talaka. Mpe mingi ya bilumbu ya munu mu me baka yawu na bantu ya masolo ya kieleka, bayina zolaka kieleka ve lweka mosi, bawu sonikaka kaka mambu, nyonso yina ya vwandaka, yina mabuundu salaka. Mpe munu . . . Kieleka, lweka ya ntendulu ya Bunzambi, mu ke meka na kutula yawu na zulu kuna na munu mosi, na mutindu ya mbote yina mu zabila. Mpe bantangu yankaka kana mu zonza mwa ngolo to na mutindu kukondwa kuyindula mutindu yina, mu zola ve kutuba yawu na mutindu yina. Muntu nyonso zaba ti, yina zaba munu, ti mu zola ve kusala yawu. Mu zola kaka . . . Kasi samu na kusala nsongi na yinti, beno . . . Kaka mutindu kukotisa nsoso na dibaya, kana beno bula yawu na zulu kuna, ya ke simba ve. Beno fwana kotisa yawu na kati mpe kukanga yawu, samu ti ya simba yawu. Mpe ya kele yina mu ke na kumekaka na kusala. Na yawu ya kele ve ti mu ke meka na kundima ve, samu ti mu ke zonza samu na ba-dénomination mingi mpe nyonso yankaka, na yawu yawu ve . . . ti.

<sup>14</sup> Mu ntangu nyonso ke tubaka, ya kele mutindu kutula ya bidimbu na bibulu. Mu ke bambuka moyo bamvula mingi me luta mu vwandaka ya kuvwanda kilumbu mosi ntangu bawu vwandaka . . . bawu vwandaka vukisa na printemps, na kumatisaka bibulu na mfinda, mpe mu sadisaka na kunata bibulu na zulu na, yina bawu ke bokilaka lupangu ya bibulu kisika Kimvuka ya Hereford ke salaka kudia matiti na Troublesome River Valley. Mpe mu vwandaka ya kuvwanda kuna dikulu ya munu ya kutula na zulu ya yintu ya kiti ya mpunda, na kutalaka mbote ntwadisi mutindu yandi vwandaka tala mbote bibulu yayi kusabuka lupangu ya bibulu.

<sup>15</sup> Ntangu yayi, beno fwana vwanda . . . ya kele ntangu beno ke kwenda na lupangu ya luyalu, mpe beno fwana vwanda na kiyeka ya kusala bilanga ya tonne ya matiti ntete beno lenda kutula ngombe ya kento na kudia matiti. Mpe konso ranch ke salaka matiti mingi, bibulu mingi, kuna ba lenda ndima bawu.

<sup>16</sup> Ntangu yayi, ba vwandaka sabuka kuna na mitindu nyonso ya bidimbu na zulu ya bawu. Bayankaka ya bawu vwandaka na

“Bar X.” Tata Grimes kaka na manima ya beto kuna vwandaka na “Diamond T,” T na nsuka mosi ya diamond. Ya vwandaka na yina “Lazy K,” kaka na zulu na yintu ya Troublesome River. Ya beto vwandaka “Turkey Track.” Kaka na yisi ya beto vwandaka “Tripod.” Mpe ya vwandaka na mitindu nyonso ya bidimbu yina vwandaka sabuka mwelo yina.

<sup>17</sup> Mpe mu talaka ti ntwadisi ata mbala mosi ve vwandaka kipe bidimbu yango, yandi vwandaka tala ata mbala mosi ve na yawu. Ntangu yankaka ya vwandaka na lweka ya kento ya ngombe ya kento, na yawu yandi zolaka to ve kumona kidimbu. Na yawu ya—ya vwandaka ve ti yandi vwandaka tala mbote na kidimbu. Kasi kima mosi yandi vwandaka kwikila, ti ata ngombe ya kento sabukaka kuna kana ti yandi vwandaka na plaque ya menga na dikutu ya yandi. Ya zolaka vwanda menga ya kieleka ya Hereford to ya zolaka kota ve na mfinda yango. Kidimbu vwandaka sala luswaswanu mingi ve, kasi ya vwandaka plaque ya menga. Mpe mu banza ya kele yina ya ke vwanda na lufundusu. Ya ke vwanda ve kidimbu yina beto ke lwata, kasi Yandi ke tala na plaque ya Menga, “Ntangu Mu ke mona Menga, Mu ke luta na zulu ya beno.”

(Ntangu yayi, mu me zimbana fyoti, Gene, mutindu yina?) [Mpangi Gene Goad me tuba, “Microphone *yayi* ke fwokula ndinga.”—Mu.] (Ke fwokula ndinga. Mbote mingi . . . Ba me balula yawu na kati-kati ya zole, ya kele kieleka?) [“*Yayi* kele mbote mpe *yina* kele mbote mingi ve.”] (Mbote mingi. Matondo na nge Mpangi Gene. Mbote mingi.)

<sup>18</sup> Ntangu yayi beto ke meka na kubasika na ntangu ya mbote na nkokila yayi, samu beto kulenda kuvutuka mbasi na nkokila mpe kubaka bansungi yayi. Mpe mu ke tuba na beno, ya kele mpasi mingi na munu na kubumba mosi ya bima yayi ya nene yina kele na lweka ya nzila; mu ke meka kaka na kubasisa yawu nyonso na nkokila mosi. Beno zaba, ya kele mutindu ya nkadulu ya munu, kasi beto fwana bumba kaka yawu fyoti tii konso nkokila.

<sup>19</sup> Ntangu yayi, kaka ntete beto banda na kuzibula Buku ya nene, beto lendaka telama kaka mwa ntangu kaka fyoti samu . . . Kusoba kuvwanda ya beno na . . . na yina beto ke telama, bayina lenda. Mpe ti beto kulumusa bayintu ya beto ntangu yayi, na buzitu, samu na ndinga ya kisambu:

<sup>20</sup> Tata ya beto ya Mazulu, beto ke na kubelama dyaka na Kiti ya Nge ya kimfumu ya Santu, na kukwizaka kukondwa lukwikilu ya kubwa, samu ti beto ke na kukwizaka samu ba me lomba na beto na kukwiza. Beto lenda tuba ve beto ke na kwiza na nkumbu ya dibuundu mosi to dénomination mosi, to na nkumbu ya dibuundu yayi, to na nkumbu ya beto mosi, samu beto ke vwanda ve na kivuvu na yawu, kana ti beto ke lenda kuzwa bantu yayi na Nzambi to ve. Kasi ntangu Yesu tubaka

na beto, “Beno lomba na Tata nyonso na Nkumbu ya Munu, Mu ke sala yawu,” na yina beto zaba beto me kwiza na Nkumbu ya Yesu, Nge ke kuwa beto, Tata.

<sup>21</sup> Beto kele na nsayi mingi na yina beto ke tanga na bambangi ya bilumbu yina lutaka, mutindu bawu kangaka kimbangi ya bawu na menga ya bawu mosi, na yina, Tata, ya ke sala beto kutala ti beto ke na kusalaka fyoti mingi na kilumbu yayi. Mpe mu ke sambila Nge, ti Nge ke lemvočila kimpubulu ya beto—ya beto—ya beto, mutindu beto kele, na yina me tala dyambu ya Nge. Mpe beto ke sambila ti Nge ke pakula beto dyaka na yina beto ke tanga Ndinga ya Nge, mpe kumona mpasi yina me natama na bilumbu me luta samu na kusala mutindu ya Dibuundu ya kuvuluka ya nene yayi ya Nzambi ya moyo.

<sup>22</sup> Mu ke sambila Nge, Tata ya Mazulu, na kuzonza na nkokila yayi na nzila ya beto samu ti beto zaba ve yinki ya kutuba; beto ke na kuvingila kaka mpe beto ke na kulomba kisambu yayi awa samu ti beto kele na Mvwandulu ya Nzambi na kati ya Dibuundu ya Yandi, mpe beto ke lomba ti Mpeve-Santu yina kele na bantu yayi kuvukisa bangolo ya Yawu kintwadi na nkokila yayi mpe kuningisa Nsangu ya mbote na kati ya konso ntima, ti ya ke pesa beto kutelama ya malu-malu mpe kivuvu ya malu-malu samu na nsungi yina ke na kwiza. Pesa yawu, Mfumu, samu ti beto ke mona yinti ya fike kubasisa makasa ya yawu mpe Israël kukuma yinsi, mpe bilumbu ya Bantu ya makanda ke na kuzimbanaka mpe ba ke na kutangaka yawu, mpe beto ke na kutala na nkwezulu ya Mukudi ya nene, Mfumu ya beto Yesu Klisto.

<sup>23</sup> Tambula na kati-kati ya beto, Mfumu. Mutindu ya tubamaka na nkokila yayi, “Nge ke tambula na kati-kati ya minda,” na yina tambula na kati-kati ya beto na nkokila yayi, Mfumu. Mpe pesa malongi na bantima ya beto na yimbi yina kele na ntuala, mpe pesa beto lubakusu ya Ndinga ya Nge, samu ti beto me lomba yawu na Nkumbu ya Yesu. Amen. Benolenda vwanda.

<sup>24</sup> Ntangu yayi, mutindu mu ke na kutubaka kilumbu nyonso, mu ke meka kaka kuzwa lutangu yina kele ya kusonika na papie mutindu mu lenda, na bantangu, bisika, mpe nyonso yankaka, samu ti ya kele dyambu ya disolo yina beto ke zonzila. Ya kele disolo, mpe ntangu yayi beto ke kuma, mpe, ke fwanikisa yawu na ntangu.

<sup>25</sup> Ntangu yayi, Lumingu na suka mpe Lumingu na manima ya midi . . . to Lumingu na nkokila, na kisika, beto kuzwaka ntangu ya nkembo. Mu ke ndima ti beto kuzwaka. Mu kuzwaka, munu mosi. Mpe na Luzayikisu . . .

<sup>26</sup> Ntangu yayi, yinki beto ke na kulongokaka? Luzayikisu ya Yesu Klisto. Mpe yinki beto monaka ti Nzambi talisaka luzayikisu mpe nani Yandi vwandaka? Kima ya ntete beto monaka, na baluzayikisu nyonso, ti Nzambi kuzabanaka nani

Yandi vwandaka. Ti, Yesu vwandaka ve muntu ya tatu na butatu, Yandi vwandaka butatu na muvimba. Yandi vwandaka mbala mosi Tata, Mwana, mpe Mpeve-Santu. Mpe ya vwandaka luzayikisu. Bambala yiya ba zonzilaka na kapu mosi, ti Yandi vwandaka Nzambi ya ngolo nyonso; Yandi yina vwandaka, yina kele, mpe yina ke kwiza; Kifumba mpe Nkuna ya David.

<sup>27</sup> Ntangu yayi beto monaka, kuna, ti na bima yayi beto ke meka na kukumisa pwelele dyambu ya muvimba, samu ti mu zaba dyaka ve ntangu beto ke kuwa dyaka Yawu, ya lendaka vwanda dyaka ve, tii ntangu ke vwanda dyaka ve mpe ke zimbana na kati ya Seko. Mpe ntangu yayi, mutindu ke tuba, ya lendaka vwanda na bankundi mingi, milongisi yina longokaka mbote samu na kuzonza yayi kulutila munu, mpe kukondwa ntembe lendaka kuzwa ntendulu ya mbote na yawu, kasi Nzambi me tula yawu na zulu ya ntima ya munu na kusala yawu mpe na yawu mu ke vwanda muntu ya luvunu kana mu ke tuba kaka ve yina mu banza vwandaka kieleka. Beno me mona? Na yawu, mu—mu ntangu nyonso ke zola pwelele na ntuala ya Nzambi, na bantangu nyonso, ti “Mu ke tina ve” mutindu Paul tubaka, “na kupesa beno malongi kilumbu mpe nkokila, na masa ya meso, ti dibuundu lenda vwanda ya kutelama kuna.” Kana ya kele na mosi ke zimbana, menga ke vwanda ve na zulu ya maboko ya munu, samu ti mu zola kuvwanda pwelele na menga ya bantu nyonso na kilumbu yango. Na yawu kana beno ke tala mutindu yankaka, mbote, ya kele, kaka na mutindu ya bumpangi, ya ke vwanda kaka mbote. Ntangu yayi, kasi, ya lendaka vwanda ti Mfumu ke monikisa kima yina ke sadisa beto nyonso, kintwadi.

<sup>28</sup> Ntangu yayi, kima ya ntete, beto ke mona ti Yandi monikisaka Yandi mosi. Ntangu yayi beto me bakula nani Yandi vwandaka.

<sup>29</sup> Ntangu yayi, mutindu mu salaka kutuba yango ya mwa kumwangisa yango ya maza, mpe mbotika na nkumbu ya “Tata, Mwana, Mpeve-Santu” na kuvwandaka mbotika ya Katolika mpe ve mbotika ya ba-Protestant to ya Ngwisani ya Malu-malu, mu banza ti mu me sala yawu pwelele. Mpe mu yufulaka muntu nyonso yina ke talisa kisonama ya Masonuku kisika muntu kubotamaka ntete na Biblia to tii na Lukutakanu ya Loadika kisika ba yidikaka dibuundu ya Katolika, kisika ba botikaka ntete muntu na nkumbu ya “Tata, Mwana, Mpeve-Santu,” lemvo beno kwiza talisa munu yawu. Mpe mu ke tula na zulu ya manima ya munu, “profete ya luvunu,” mpe mu ke tambula na bala-bala. Ntangu yayi, mu ke sala kaka yina. . .ve samu na kuvwanda muntu ya mpasi, kasi kaka samu na kutalisa beno ti ya kele Kieleka. Beno me mona?

<sup>30</sup> Ntangu yayi, kuna Biblia ke monikisa Yandi awa, ti Yandi kele Nzambi ya Ngolo nyonso, nsuni na kati-kati ya beto. Beno me mona? Ve Tata, Mwana, mpe Mpeve-Santu; ya kele ve banzambi tatu, to Nzambi mosi yina ba me zenga na bisika

tatu. Ya kele Nzambi mosi yina ke salaka na kati ya bisalu tatu: Butata, Bumwana, mpe Mpeve-Santu. Nzambi zolaka mbote kubanda na nsaba ya Eden, na kumekaka na kusala nzila ya Yandi ya kuvutuka na kati ya bantima ya bantu, samu na kuzinga mpe kuvwanda dyaka bana ya babakala mpe bana ya bakento ya Nzambi na Yandi. Ya kele Nzambi na zulu ya beto, Nzambi na beto, Nzambi na kati ya beto. Beto tala luswaswanu. Beno me mona?

<sup>31</sup> Mpe ntangu yayi bima yango, mpe Biblia ke monikisa yawu mpe me tubila yawu na bufyoti-fyoti na kapu ya Ntete ya Apocalypse; yina kele Buku kaka na Biblia, na Ngwisani ya Malu-malu, canon ya muvimba ya Ngwisani ya Malu-malu, kele Buku kaka yina Yesu tulaka na zulu kidimbu ya Yandi mosi. Mpe Yandi tubaka, ya ntete ya Yawu, “Lusakumunu kele na yandi yina ke tanga mpe yandi yina ke kuwa.” Mpe na nsuka, Yandi tubaka, “Kana muntu mosi kukatula ndambu mosi ya Yawu, to kubwela kima mosi na Yawu, mutindu mosi ba ke katula, ndambu ya yandi, na Buku ya Luzingu.” Na yawu ya kele nsingulu na muntu nyonso ke katula kima, yayi kele Luzayikisu ya muvimba ya Yesu Klisto. Na yawu kana beno sala Yandi tatu, beno zaba yinki ke salama. Beno me mona, nkumbu ya beno ke katuka.

<sup>32</sup> Mpe ata muntu, ata Protestant, ata dibuundu ya ntete kwikilaka ntete na banzambi tatu. Ya vwandaka dyambu ya nene na Lukutakanu ya Nicée, mpe bawu zole kwendaka bintala; na kubasikaka mutindu *yayi*, na mutindu ya kutuba. Ya *butatu*, bantu ya butatu yina ke kwikilaka na butatu, bayina na nsuka yidikaka dibuundu ya Katolika, ba kwendaka sukisa butatu, na kusalaka Nzambi bantu “tatu”. Mpe ya vwandaka na mosi yina kwikilaka ti Nzambi vwandaka “mosi,” mpe bawu kwendaka lweka yankaka na kuvwanda *ba-unitaire*. Bawu zole kele na foti. Nzambi lenda ve . . .

<sup>33</sup> Yesu zolaka vwanda ve tata ya Yandi mosi, mpe to dyaka Yesu kuzwa tata mpe Yandi kuvwanda . . . ya ke vwanda banzambi tatu. Ya—ya zolaka simba ve. Samu ti kana Yandi kele na tata, mpe ti tata kele muntu yankaka na Yandi, kuna Yandi zolaka . . . mpe Mpeve-Santu kele mosi yankaka, Yandi kele mwana ya makangu. Biblia ke tuba ti Mpeve-Santu vwandaka Tata ya Yandi. Mpe kana beto kele na Mpeve-Santu, na yina ya kele ve Mpeve-Santu, ya kele Tata na kati ya beto na nkumbu ya Mpeve-Santu, na kusadilaka kisalu na kati ya beto, samu ti ya vwandaka mbala mosi na muntu nkumbu Mpeve, mpe me vutuka mpe Yawu kele na kati ya beto ntangu yayi, Jéhovah Nzambi mosi. Beno me mona?

<sup>34</sup> Ya kele ve na banzambi tatu. Banzambi tatu kele bumpani mpe bumpakanu, mpe ya natamaka. Mpe kana beno ke vwanda kaka sabala ya muvimba mpe kuvwanda na mabanza ve, kasi kutala mbote, kubaka yawu, disolo. Beno baka masolo mosi mu



ke baka to ya muntu mosi, disolo nyonso. Ti beto zaba kaka yawu, ti masolo nyonso ke fwanakana mutindu mosi. Bantu ya masolo yango kele na kima ve ya kusala na lweka mosi, bawu talaka kaka mbote na kutuba mambu, yina salamaka. Mpe beno tala mbote kieleka mutindu kima yango lutaka na malembe na Luther mpe lutilaka na Wesley, mpe na manima me talana na bilumbu ya nsuka, mbotika na nkumbu ya “Tata, Mwana, mpe Mpeve-Santu.” Beno tala kaka mbote kisika ya kotaka na dibuundu ya Katolika, na Bansungi ya Mudidi, basikaka na nzila ya Luther, kuna na nzila ya Wesley, kasi na kati-kati ya Wesley mpe Laodicée (na nsuka) ya zolaka talana. Ya kele kieleka. Ntangu yayi, mpe yayi kele nyonso disolo, mpe kaka disolo ve, kasi ya kele Biblia.

<sup>35</sup> Mpe ntangu yayi, na nkokila yayi, beto ke zonzila na Bansungi Sambwadi ya Dibuundu yina vwandaka mabuundu sambwadi yina vwandaka na Asie Mineur na ntangu ya kusonama ya Buku. Mabuundu yayi na ntangu yina zolaka vwanda na mitindu ya bansungi ya dibuundu yina vwandaka kwiza, samu ti ya . . . Ya vwandaka na mabuundu mingi kulutila yina, dibuundu ya Colosse mpe mingi yankaka na ntangu yina, kasi Nzambi bakaka mabuundu yayi samu na mitindu ya yawu.

<sup>36</sup> Ntangu yayi, beto talaka ti Yandi telamaka na kati-kati ya minda sambwadi ya wolo, Yandi vwandaka na diboko ya Yandi bambwetete sambwadi. Mpe bambwetete sambwadi yango, Yandi tubaka, na nzila ya 20 ya kapu ya Ntete, ti “Bawu kele bawanzio sambwadi na mabuundu sambwadi.”

<sup>37</sup> Ntangu yayi, na Biblia ba bakulaka ve Luzayikisu yayi. Samu ti, wapi mbote ya ke sala bawu na kutala mpe kuingila kana bawu zabaka ya ke vwanda na mafunda ya bamvula ntete Yesu kwiza? Ya pesamaka ve na bawu.

<sup>38</sup> Mpe mu ke tuba na yayi, na beno bantu awa, beno bantu ya Katolika, na beno ba-Luthérien, na beno ba-Méthodiste, mpe nyonso, ya pesamaka ve na Martin Luther, Nsemo yina kele na zulu ya Ndinga bubu yayi. To dyaka ti ya pesamaka na John Wesley. John Wesley longaka kusantisama yina Luther lutaka na zulu. Mpe Nsemo ke kwizaka mutindu beto ke na nsatu ya Nsemo. Nzambi ke tuba Yawu, mpe Yawu ke zibuka ve samu na beto samu ti Yawu kele ya kubumbama na meso ya beto tii kilumbu ti Nzambi ke lenda kumonikisa Yawu. Mu ke kumiyufula wapi mutindu ya ke vwanda na manima beto me kwenda? Yinga, mu kele ya kundima ti ya kele na mingi, mingi dyaka ya kulutila ti beto zaba kima mosi ve. Ya kele kieleka. Ya kele na Bidimbu Sambwadi, kana beto baka kaka Buku ya movimba ya Apocalypse, yina kele ya kukanga na manima ya Buku. Ya kele mpe ve . . . kele ve ya kusonika na kati ya Buku. Mpe Bidimbu yango ke zibuka na ntangu ya nsungi ya dibuundu yayi, mpe mansweki sambwadi ya nsuka ya Nzambi ke vwanda ya kuza- . . . ke zabana. Oh, mu ke zola kaka kubumba

yawu kisifu nyonso mpe kutala Yawu. Yinga, tata! Bansungi Sambwadi ya Dibuundu.

<sup>39</sup> Mutindu Daniel kuwaka bidumu sambwadi, mpe ba niminaka yandi; mpe Jean kuwaka makelele, mpe Buku yayi vwandaka ya kukangama, mpe manima ya buku vwandaka ya kukangama na Bidimbu Sambwadi; kasi na bilumbu ya Bidimbu yayi ke zibuka, “Dinsweki ya Nzambi ke suka.” Na nzonzolo yankaka, Nzambi ke zabana na Dibuundu ya Yandi; na mutindu bantu tatu ve, kasi mutindu Persona mosi. “Dinsweki ya Nzambi ke monana,” mpe ntangu yawu ke vwanda nyonso ya kumonana, kuna mansweki sambwadi ke kuzibuka na Dibuundu; samu ti, na kuna, Dibuundu ke zinga na yisi ya lutwadusu ya Mpeve-Santu, Yandi ke sala na kati mpe na ngaanda mpe ke talisa bidimbu ya Yandi ya kuvwandaka moyo mpe na kati-kati ya beto, na kuzingaka na kati-kati ya beto, mpe beto ke sambila kuna Klisto ya moyo yina kele na kati-kati ya beto.

<sup>40</sup> Beno tala ata mbala mosi ve na mabuundu ya nene mpe bima ya nene. Ntangu beto ke kuma na nsungi yayi ya Pantekote, kieleka beno ke mona kisika bawu zimbanaka. Dibuundu ya kieleka ya *Laodicée* zola kutuba “ya bimvwama, kele na nsatu ya kima ve,” mpe kinkonga, mawa, mpofo, na mpasi mingi, mpe zaba yawu ve. Beno me mona? Bawu landaka mongo ya nene, mpe bayinzo ya nene, mpe nyonso yankaka.

<sup>41</sup> Na kutala, Dibuundu ntangu nyonso ke vwandaka mvindu ya ntoto. Mpe awa bawu vwandaka: ya kuyina na bantu nyonso, ya kumanga, na babala-bala, bisika nyonso bawu lendaka zinga. Beno tanga Hébreux 11, mpe beno baka banzila ya nsuka ya sambanu to ya nana ya yawu, mutindu “bawu vwandaka yenga-yenga na bantoto ya kuyuma, mpe—mpe vwandaka lwata bilele ya bampusu ya mameme mpe ya bankombo, mpe vwandaka bamputu, mpe na bampasi, mpe ya ke monisama mpasi.” Bantu yango kuna, wapi mutindu kimbangi ya beto ke telama na ntwala ya bawu na kilumbu ya Lufundusu? Beno me mona, bantu yango na kilumbu yina.

<sup>42</sup> Ntangu yayi, na kati ya nsungi ya dibuundu yayi. . . Beto kele na mabuundu sambwadi, ntangu yayi mu zola kutala yawu na kisika. Mu banza ve ti beno lenda mona yawu kubanda awa, ya lendaka vwanda kana bayankaka ya beno lendaka, mu ke kwikila yawu mingi ve, kasi mu ke meka na kusala yawu, (Mu zaba ti beno lenda ve, na kuvwandaka na yisi awa), kusala Bansungi Sambwadi ya Dibuundu. Mu ke simba yawu na diboko ya munu samu beno bakula.

<sup>43</sup> Ya bandaka, Dibuundu bandaka na Pantekote. Ya kele na muntu ke ndima yawu ve? Ve, tata! Dibuundu bandaka na Pantekote na Lusakumunu ya Pantekote, mpe kuzwaka lutumu na Yesu Klisto na kulandila tii kilumbu ya nsuka na Nsangu mosi mpe lusakumunu mosi ke na kusalaka na kati ya beto.

Kisalu ya Yandi ya nsuka na Dibuundu ya Yandi, na Marc 16, “Beno kwenda na yinza nyonso, beno longi Nsangu ya mbote, bidimbu yayi ke landa bawu yina ke kwikila.” Ntangu yayi, wapi bisika? “Na yinza nyonso.” Na nani? “Na kivangu nyonso.” Muntu-ndombe, ya mbwaki, jaune, mundele, mutindu nyonso ya kivangu ya vwandaka, beno longi Nsangu ya mbote na kivangu nyonso. “Bidimbu yayi ke landa bayina ke kwikila.” Ntangu yayi, na nkokila yayi beto ke landila na malembe na kati ya yawu, ke banda kaka na kuzenga na nkokila yayi, konso nkokila kuzenga kitini ya nene mingi ya Yawu tii beto ke kuma na nsungi ya dibuundu ya beto mosi. Ntangu yayi, beto ke tala ti yina vwandaka lutumu ya Yandi.

<sup>44</sup> Ntangu yayi, nsungi ya dibuundu ya ntete vwandaka dibuundu ya Ephèse. Nsungi ya dibuundu ya zole ya dibuundu vwandaka Smyrne. Nsungi ya dibuundu ya tatu vwandaka Pergame. Nsungi ya dibuundu ya yiya vwandaka Thyatire. Nsungi ya dibuundu ya tanu vwandaka Sardes. Mpe nsungi ya dibuundu ya sambanu vwandaka Philadelphie. Mpe nsungi ya dibuundu ya sambwadi vwandaka Laodicée.

<sup>45</sup> Ntangu yayi, nsungi ya dibuundu ya ntete kubandaka pene ya mvula 53 na Manima ya Yesu, ntangu Paul salaka dibuundu na—na Ephèse. Na nzyetolo ya yandi ya ki-missionaire, yandi salaka dibuundu na—na Ephèse, dibuundu ya Ephèse, mpe vwandaka pasteur ya yawu tii ntangu ba zengaka yandi yintu na mvula 66, yina salaka yandi pene ya bamvula makumi zole na zole pasteur ya dibuundu ya Ephèse. Na manima ya lufwa ya yandi kuna ba tubaka na beto ti Santu Paul. . . to Santu Jean ya ntumwa kumaka pasteur ya dibuundu mpe landilaka na kunata yawu na nsungi yayi, mpe nsungi ya dibuundu kwendaka tii na mvula 170.

<sup>46</sup> Kuna na manima ya Nsungi ya Dibuundu ya Ephèse, kubanda na mvula 53 na Manima ya Yesu tii na mvula 170 na Manima ya Yesu, na manima bandaka Nsungi ya Dibuundu ya Smyrne yina bakaka bilumbu kubanda mvula 170 na Manima ya Yesu tii na mvula 312 na Manima ya Yesu. Na manima kwizaka Nsungi ya Dibuundu ya Pergame, mpe Nsungi ya Dibuundu ya Pergame kubandaka na 312 mpe bakaka bilumbu tii na mvula 606 na Manima ya Yesu. Na manima kwizaka Nsungi ya Dibuundu ya Thyatire, mpe nsungi ya dibuundu ya Thyatire kubandaka na 606 mpe kwendaka tii 1520, Bansungi ya Mudidi. Mpe na manima bandaka Nsungi ya Dibuundu ya Sardes na 1520 mpe bakaka bilumbu tii 1750, nsungi ya Luther. Na manima kubanda 1750, nsungi yankaka kwizaka ya vwandaka Philadelphie, nsungi ya Wesley; ya bandaka na mvula 1750 mpe bakaka bilumbu tii na mvula 1906. Mpe na mvula 1906 Nsungi ya Dibuundu ya Laodicée bakaka kisika, mpe mu zaba ve wapi ntangu yawu ke suka, kasi mu ke zabisa yawu na ntuala ti ya ke suka pene ya mvula 1977. Mu ke zabisa na ntuala, Mfumu ve

me tuba, kasi mu zabisa na ntwala ya kele landila vision yina talisamaka na munu mwa bamvula me luta, ti, tanu ya bima yango me (na kati ya sambwadi) me salama yimeni.

<sup>47</sup> Pene . . . Bantu yikwa na kati ya dibuundu, ke bambuka moyo na vision yango? Kieleka. Ya tubaka ti, mutindu ti Kennedy mpe zolaka vwanda ya kusola na bavote ya nsuka yayi. Mutindu ti bakento zolaka kuzwa muswa ya kusala vote. Mutindu ti Roosevelt zolaka nata yinza na mvita. Mutindu ti Mussolini zolaka kwenda na Ethiopie, na kukota ya yandi ya ngolo ya ntete, mpe zolaka baka yawu; yina zolaka vwanda nsuka, yandi zolaka kufwa na manima ya yawu. Mutindu ba-isme ya nene yayi zolaka telama mpe nyonso kubwa na kati ya Communisme; Hitlérisme, mpe Mussolini, mpe Co- . . . Nazisme, mpe nyonso yankaka, zolaka nyonso kubwa na kati ya Communisme. Mpe bamvula kumi na mosi na ntwala, ya tubaka ti “Beto ke kota na mvita na Allemagne, mpe Allemagne zolaka vwanda na kibaka ya matadi na manima,” Nzila ya Maginot. Ya salamaka kaka mutindu yina. Tubaka kuna, na manima ya yawu, zolaka kuma na kisika ti . . . ke salama ti science ke kwenda nene mingi ti bawu ke sala ditoma, matoma ke kuma mingi mutindu “diki” ntangu nyonso. Mpe vision yango tubamaka kaka awa kisika Dibuundu ya Klisto kele ntangu yayi, na ya ntama . . . yinzo ya bunsana. Charlie Kern, lendaka vwanda na kati ya dibuundu na nkokila yayi, yandi vwanda vwandaka kuna na ntangu yina. Lumingu mosi na suka pene ya ngunga ya sambwadi ya salamaka. Mpe Yawu tubaka, “Na manima ya ke salama ti bawu ke sala ditoma yina bawu ke vwanda na nsatu ya volant ve na kati ya yawu, ya ke vwanda ya kutwadisa na mwa mutindu ya ngolo.” Ba kele na yawu ntangu yayi. Ba kele na yawu ntangu yayi, na ngolo ya magnétique, na lutwadusu ya radar. Ba kele mpe na nsatu ve . . . beno tula kaka radar ya beno na kisika beno ke na kukwendaka, ya ke nata beno, beno kele na nsatu ya volant ve.

<sup>48</sup> Ntangu yayi, mpe ya tubaka na kati kuna, “Nq ntangu yina, ya ke vwanda na kento mosi ya nene yina ke telama na États-Unis.” Mpe yandi vwandaka ya kulwata mpe kitoko, kasi yandi vwandaka yimbi na kati ya ntima. Mpe mu ke na ba-parenthèse na vision, mpe mukanda ya mwaki, ya kutuba, “ya lendaka vwanda dibuundu ya Katolika.” Mpe na kupesaka muswa na bakento na kusala vote ke sadisa nsodolo ya muntu ya yimbi samu na yinsi yayi. Mpe ya kele yina bawu salaka. Kieleka. Ntangu yayi, tubaka, “Yina ke vwanda kubanda.”

<sup>49</sup> Ntangu yayi kima yankaka ya tubaka, ti . . . Kuna mbala mosi na manima ya yawu, mu monaka yinsi yayi kukuma mutindu mulinga, me pasuka kaka na bitini-bitini. Ntangu yayi, kana bima yina me salama, mutindu mosi ke vwanda yayi yankaka. Beto kele na . . . Ya kele samu na yina mu kele awa na nkokila yayi na kumeka na kunata yayi mpe kutula yawu na kisika na bantu yayi na Jeffersonville, samu ti mu ke na kukubikaka na

kukwenda dyaka na bilanga ya kumwangisa nsangu na bilumbu fyoti, mpe mu zaba ve wapi ntangu ti ba lendaka bokila to kubaka munu. Mu—mu... beto zaba yawu ve. Mpe mu zola kieleka ti mu... kusala dibuundu kuzaba ngunga bawu ke na kuzingilaka, samu ti Nzambi ya Ngolo nyonso ke sala munu mfumu ya yawu.

<sup>50</sup> Ntangu yayi—ntangu yayi, mosi na mosi ya mabuundu yayi, landila Masonuku kuna, vwandaka na wanzio. Mpe wanzio vwandaka... Bantu yikwa zaba yinki *wanzio* zola kutuba? Ya kele “munati-nsangu,” munati-nsangu. Mpe ya—ya vwandaka na *bawanzio sambwadi* na mabuundu sambwadi, ya zola kutuba “minati-nsangu sambwadi.” Ntangu yayi, mpe bawu vwandaka bambwetete na diboko ya Yandi. Mpe na diboko ya Yandi kumi na zole ya bayayi—ya bayayi... bambwetete sambwadi yayi yina vwandaka lakisa Nsemu ya Mvwanulu ya Yandi na kilumbu ya mpimpa yina beto ke na kuzingilaka. Mutindu bambwetete ke lakisaka mwini na ntoto, ke salaka nsemu ya yawu samu beto lenda kutambula, mpe kukwenda bisika na ntangu ya mpimpa.

<sup>51</sup> Ntangu yayi beto ke tala kuna, ti na kati ya ntangu yayi, ti mosi na mosi ya bawanzio yango vwandaka na ntelamanu mpe kisika. Mpe, bankundi, na nkokila yayi beto ke baka yawu ve, samu ti beto zaba wanzio yayi ya dibuundu ya ntete, kasi ya ke vwanda kima ya kinsweki mpe ya nkembo na kuzwa mpe kubasisa na disolo, na ntwala ya beno, bawanzio ya mabuundu yankaka yayi. Wanzio ya dibuundu ya ntete vwandaka Santu Paul, yandi salaka yawu, munati-nsangu ya Nzambi. Wanzio ya dibuundu ya Ephèse vwandaka Santu Paul. Dibuundu... Ntangu yayi, ya kele samu na yina mu... .

<sup>52</sup> Ntangu yayi, bayankaka yayi beno lendaka manga, kasi mu vwandaka kuna bilumbu mpe bilumbu na yisi ya lutwadusu tii mu kuwaka Mpeve-Santu kusimba munu mpe kupakula munu samu na yawu. Ya kele samu na yina mu zaba. Mpe beno tala mbote bantu yayi yina ba me baka, kana beno kele muntu ya disolo, bawu... Bantu mosi yina mu me kuzwa awa, mpe mu zaba na luzayikisu ti ba vwandaka bawanzio samu na dibuundu, ba kuzwaka ministere mosi yina bayayi kuzwaka na mbandukulu. Mpe ministere yango lenda soba ve, ya fwana vwanda pantekote nzila nyonso.

<sup>53</sup> Ntangu yayi, bantu ya masolo ya kuvwanda awa ke wisana na munu ve na zulu ya muntu yayi; kasi na dibuundu ya Smyrne, Irénée kele yina mu zaba yina vwandaka wanzio ya kilumbu yina. Polycarpe, mingi ya beno ke tuba ya vwandaka Polycarpe, na kisika, beno ke tuba ya vwandaka yandi. Kasi Polycarpe vwandaka mingi ya kukangama na organisation mpe na Katolika, nsambulu yina vwandaka mata. Kasi Irénée vwandaka muntu yina vwanda zonzaka na bandinga, mpe vwandaka na ngolo ya Nzambi, mpe bidimbu vwandaka landa yandi. Yandi vwandaka wanzio ya Nsemu ya Nzambi, mpe yandi

landilaka na kunata Nsemo na manima ba me koma na kulunsi to ba me kufwa, ba me vonda Polycarpe, na yina Irénée vwandaka mosi ya milongoki ya yandi, mpe Polycarpe vwandaka kilongoki ya Santu Paul. . . to ya Santu Jean. Mpe na manima Irénée bakaka kisika ya yandi, mpe yandi nataka Nsemo.

<sup>54</sup> Mpe wanzio ya Nsemo ya—ya Pergame vwandaka Santu ya nene Martin. Mu banza ve ti ya me vwandaka ntete na muntu ya kulutila nene na zulu ya ntoto, na ngaanda ya Yesu Klisto, na Santu Martin. Ngolo? Bantu yina ke kufwaka bantu kwizaka na yandi na kuzenga laka ya yandi (yandi kwikilaka na bidimbu mpe mambu ya ngitukulu, mpe na Lusakumunu ya Pantekote), mpe ntangu ba kwendaka, ba zolaka kufwa yandi, yandi katulaka kazaka ya yandi mpe pesa bawu laka. Mpe ntangu muntu yina ke kufwaka bantu telemisaka mbele na kuzenga laka ya yandi, ngolo ya Nzambi bulaka yandi na kuvutulaka yandi na manima ya yandi, mpe yandi fukamaka na kutambula na kulomba yandi na . . . ? . . . Amen. Yandi vwandaka wanzio ya dibuundu.

<sup>55</sup> Bima yankaka. Beno tala mbote mutindu yandi. . . Ba lekika mosi ya bankundi ya yandi, yandi vwandaka na nzila samu na kumeka na kumona yandi, kumona yinki salamaka. Mpe ntangu yandi kumaka kuna, ba lelikaka yandi. Yandi vwandaka ya kulala kuna, ya kufwa, mpe meso ya yandi ya kubasika na yintu ya yandi. Yandi kwendaka na yandi mpe kubwaka na zulu ya makulu ya yandi mpe lalisaka ngunga mosi nzutu ya yandi na zulu ya yandi, na kusambilaka na Nzambi. Mpe ngolo ya Nzambi kwizaka na zulu ya muntu yango mpe vumbulaka yandi, yandi bakaka diboko ya yandi mpe kwendaka na yandi kaka kuna. Yina kele disolo, kaka mutindu George Washington, Abraham Lincoln, to nyonso yankaka. Ya kele disolo.

<sup>56</sup> Yinga, tata! Santu Martin vwandaka wanzio na dibuundu ya Pergame, yina, makwela ya dibuundu ti nataka bawu na Bukatolicisme na manima ya yawu.

<sup>57</sup> Wanzio ya dibuundu ya—ya Thyatire vwandaka Colomba.

<sup>58</sup> Wanzio ya dibuundu ya Sardes, dibuundu ya kufwa. . . Mpova *Sardes* zola kutuba “ya kufwa.” Kwizaka na nkumbu, Nkumbu ya Yandi ve, “Kasi nkumbu na yina nge ke na kuzingila, kasi nge kele ya kufwa.” Beno tala mbote mutindu bawu talisaka mbotika yango na kilumbu yina. Beno me mona, basikaka na yawu. Wanzio ya dibuundu ya Sardes vwandaka Martin Luther, mubongisi ya ntete.

<sup>59</sup> Wanzio ya dibuundu ya Philadelphie vwandaka John Wesley, munati-nsangu.

<sup>60</sup> Mpe wanzio ya dibuundu ya—ya Laodicée kele ntete ve ya kuzabana. Ya ke vwanda kilumbu mosi, kasi ya lendaka vwanda ti yandi. . . na zulu ya ntoto. “Yandi yina kele na makutu. . .” [Kisika ya mpamba na bande—Mu.] . . . beno zaba yayi kele

nsungi beto ke na kuzingilaka. Nzambi ke sala lufundusu ya yawu.

<sup>61</sup> Ntangu yayi, beno tala ntangu yayi, mpe awa beto ke kuma na Masonuku, kuvutuka na nsungi ya ntete ya dibuundu. Ntangu yayi mu ke zola . . . Mu kele na mwa bima ya fyoti ya kusonika awa yina mu zola beno kuwa mbote.

<sup>62</sup> Dibuundu ya ntete, dibuundu ya Ephèse, bisalu ya dibuundu, yina Nzambi sembaka bawu, vwandaka bisalu kukondwa zola. Musendo ya bawu vwandaka Yinti ya Luzingu.

<sup>63</sup> Dibuundu ya Smyrne vwandaka dibuundu yina ba talisaka mpasi, ba lutilaka na balukwamusu. Musendo vwandaka yimpu ya Luzingu.

<sup>64</sup> Dibuundu ya tatu, Pergame, nsungi ya malongi ya luvunu, luvunu ya Satana, mpe lufulu ya lutwadusu ya bu-pape, makwela na dibuundu mpe luyalu. Musendo vwandaka mani ya kubumbama mpe ditadi ya mpembe.

<sup>65</sup> Dibuundu ya Thyatire vwandaka dibuundu ya luvunu ya bu-pape, Bansungi ya Mudidi. Musendo vwandaka ngolo mpe kuyala ya bayinsi, mpe Mbwetete ya Suka. Ya kele mwa bantu ndambu ti lutilaka.

<sup>66</sup> Dibuundu ya Sardes vwandaka nsungi ya kubongisa, ki-missionaire ya nene. . . to ki-missionaire ve, kasi bankumbu ya kubumbama, ba vwandaka na bankumbu ya bawu mosi. Mpe musendo vwandaka kilele ya mpembe, mpe nkumbu na zulu ya Buku ya Luzingu (yina fwana vwanda na lufundusu). Beto talaka yawu kilumbu yankaka yina, Buku ya Luzingu; ba ke fundisa beno na Buku ya Luzingu. Ba ke nata mpe ke baka Basantu kukondwa yawu, bawu ke luta ve na yawu.

<sup>67</sup> Nsungi ya Dibuundu ya Philadelphie vwandaka nsungi ya zola ya bampangi, nsungi ya ksalu ya nene mpe nsungi ya ki-missionaire ya nene, mwelo ya kuzibuka. Mpe musendo vwandaka dikunzi. Kumonikisa bankumbu ya Nzambi zolaka vwanda na kati ya bilumbu—ya bilumbu ya nsungi yayi, ntangu ya vwandaka zimbana pene ya mvula 1906. Mbote mingi.

<sup>68</sup> Nsungi ya Laodicée vwandaka dibuundu ya madidi ve tiya ve, ya bimvwama, ya kifuluka na bima, na kuvwandaka na nsatu ya kima ve; kasi vwandaka mawa, mputu, mpofu, mpe mpasi mingi, mpe kinkonga. Mpe musendo vwandaka kuvwanda na zulu ya Kiti ya kintinu na Mfumu, bayina nungaka na nsungi yina.

<sup>69</sup> Ntangu yayi samu na kufyongonina, na nkokila yayi, samu na kutalisa beno mwa fyoti na lukutakanu ya nkokila yayi, beto ke baka kapu ya 2, nsungi ya dibuundu ya ntete. Ntangu yayi beto . . .

Yandi me monana mpe beto zaba nani Yandi kele, Yandi kele Nzambi!

<sup>70</sup> Ntangu yayi, nsungi ya dibuundu kubandaka mutindu mu vwandaka me tuba, pene ya mvula 53, tii mvula 170. Mpe (a) mbanza ya Ephèse, mosi ya bambanza ya nene ya Asie; yina ba vwanda bokilaka mbanza ya tatu ya lukwikilu ya Baklisto (ya ntete vwandaka Jérusalem; ya zole, Antioche; mpe ya tatu, Ephèse) . . . (c) mbanza ya mumbungu ya nene mpe ya mambu ya mbongo . . . (e) luyalu vwandaka ba-Romain . . . (f) ba vwanda zonzaka ki-Grec. Bantu ya masolo ke banza ti Jean, Marie, Pierre, André, mpe Philippe kuzikamaka kuna. Mpe Ephèse kuzabamaka na kitoko ya yawu.

<sup>71</sup> Buklisto na Ephèse vwandaka kisika ba-Juif vwanda zingaka, na Ephèse. Mpe ya tungamaka pene ya mvula 53 ya ntangu ya beto to ya mvula 55. Buklisto kukunamaka kuna na Santu Paul. Na ntwala, Santu Paul lutisaka bamvula tatu na Ephèse. Malongi ya Paul kuzwaka lutumu ya nene na mikwikidi na Ephèse. Yina landaka, Timothée vwandaka bishop ya ntete na dibuundu ya Ephèse. Paul sonikaka na dibuundu na Ephèse. In ntangu ya Paul ya vwandaka dibuundu ya nene.

<sup>72</sup> Ephèse zola kutuba . . . nkumbu ya kieleka *Ephèse* zola kutuba “kubika, kupema, retrograde.” Ya kubokila na Nzambi, “Dibundu ya retrograde.” Nzambi—Nzambi ndimaka bisalu ya bawu, mpasi ya bawu, mpe kukanga ntima ya bawu. Nzambi sembaka mutindu ya bawu ya kuzinga, na kubikaka luzolo ya bawu ya ntete, na kuvutukaka manima, mpe samu na kunataka dyaka ve Nsemu. Ephèse vwandaka ve dibuundu yina ba vunaka, ya kubwaka yawu mosi na kulandilaka ve na zola ya kulunga.

<sup>73</sup> Ephèse na bunkufi: Bambuma, kukondwa zola, nataka na kumanga lukwikilu. Bansilulu: Paladiso kusilamaka na kinungi, ya basantu ya Ephèse na nsungi ya dibuundu, ke pesama na Yinti ya Luzingu.

<sup>74</sup> Beno tala kima ya kitoko. Yinti ya Luzingu kele ya kutuba bambala tatu na Genèse, bambala tatu na Apocalypse. Mbala ya ntete ya tubamaka na—na Genèse, ya vwandaka na Eden, mpe Klisto vwandaka Yinti. Bambala tatu ya tubamaka na Apocalypse, ya vwandaka na Paladiso. Oh, ya kele bimvwama. Mfumu sakumuna.

<sup>75</sup> Ntangu yayi beto ke banda kapu ya Ntete ya Ephèse . . . to nzila ya Ntete ya kapu ya 2, dibuundu ya Ephèse:

*Na wanzio ya dibuundu na Ephèse sonika; Bima yayi ke tuba yandi yina me simba bambwetete sambwadi na diboko ya yandi ya kibakala, yina ke tambulaka na kati-kati ya minda sambwadi ya wolo;*

<sup>76</sup> Jean kele munati-nsangu na ntangu yina. Yina vwandaka tambula na kati-kati ya minda sambwadi ya wolo yayi vwandaka Yesu Klisto, Nzambi ya Ngolo nyonso. Yinki Yandi ke na kusalaka? Yandi tubaka ve ti Yandi vwandaka tambula na kati ya mwinda *mosi*, Yandi vwandaka tambula na kati ya



bawu nyonso. Yinki ya zola kutuba? Ti Yandi kele Nzambi mosi, mazono, bubu yayi, mpe kukondwa nsuka, mpe na nsungi nyonso ya dibuundu na mukwikidi nyonso. Yandi ke kwiza na . . . na Mpeve-Santu na nsungi nyonso mpe na muntu nyonso; mutindu mosi mazono, bubu yayi, mpe kukondwa nsuka.

<sup>77</sup> “Na kusimbaka na diboko ya Yandi ya kibakala.” *Diboko ya kibakala* zola kutuba “lutumu mpe ngolo” ya Yandi. Na kusimbaka na diboko ya Yandi ya kibakala (na yisi, ya lutumu) binati-nsungu sambwadi na bansungi sambwadi ya dibuundu. Oh, mu zola yawu. Beno mona Yandi kutambula na kulutaka na bansungi sambwadi yayi, Klisto, na kusalaka Yandi mosi kuzabana na bantu ya Yandi na nzila ya Bansungi ya Mudidi yayi, na nzila ya nsungi nyonso; na yina dibuundu kumaka ya misiku mpe kabukaka, mpe bayankaka kwendaka nzila mosi mpe bayankaka yankaka, kasi mwa bantu ndambu yina ya dibuundu vwandaka dyaka ya kukangama, mpe Klisto salaka na bawu, na kusiamisaka Ndinga ya Yandi; Lutisaka kaka Yawu na nzila.

<sup>78</sup> Ya kele mpasi mingi ve na kumona mutindu ti beto me kuzwa yina kele na beto bubu yayi, na yina beno ke banda na kulongoka yayi. Ntangu yayi, awa na ntonono. . . Mu banza ti beno nyonso lenda mona na zulu ya yayi. [Mpangi Branham ke na kufwanikisa na tablo—Mu.] Beno tala nsungi mosi ya dibuundu, ya kele Pantekote. Nsungi ya dibuundu ya zole, ya tatu, ya yiya, ya tanu, ya sambanu, nsungi ya dibuundu ya sambwadi. Ntangu yayi kana beno ke tala yayi kieleka mbote, Dibuundu bandaka na Pantekote. Bantu yikwa ke kwikila yawu? Beno monaka yina salamaka na Pantekote? Kuna beto ke tala mbote dibuundu mutindu yawu ke landila na kukulumukaka. Ya bandaka kaka na kukulumuka mwa mingi, mwa mingi, mwa mingi; mwa fyoti, ya ke kulumuka mutindu *yina* na yina Dibuundu ya kieleka ke kwenda.

<sup>79</sup> Ntangu yayi, Klisto. . . ata mutindu fyoti Dibuundu kele, “Kisika zole to tatu kele ya kuvukana kintwadi na Nkumbu ya Munu, Mu ke vwanda na kati-kati ya bawu.” Ntangu bawu kele ya kuvukana kintwadi na yinki? Na nkumbu ya ba-Méthodiste? Na nkumbu ya ba-Baptiste? Na nkumbu ya Pantekote? Na Nkumbu ya Yesu! Kisika zole to tatu kele ya kuvukana kintwadi, ata lutangu ya fyoti ya kele. Mpe ba ke kuma fyoti mingi na bilumbu ya nsuka tii, Yandi tubaka, Yandi fwana kwiza na nswalu mpe kuzenga na kusala kisalu nkufi to ya ke vwanda na ata nsuni ve yina ke vuuka samu na Enlevement. “Kisika zole to tatu kele ya kuvukana na Nkumbu ya Munu!”

<sup>80</sup> Ntangu yayi, nsungi ya ntete, bantumwa. Ntangu yayi, beto ke mona yayi kele ntonono, Pantekote. Yandi ke na kutambulaka, Nzambi mosi ya nene, bidimbu mosi ya nene zolaka salama nzila nyonso na bansungi yayi samu ti Yandi

vwandaka tambula na kati ya konso nsungi. Ke sakumuna nani? Bantu ya Yandi yina kele ya kuvukana na Nkumbu ya Yandi.

<sup>81</sup> Mu zola beno kutala mbote na yayi na yina beto ke tala dibuundu. Dibuundu *yayi* vwandaka na Nkumbu ya Yesu. Dibuundu *yayi* vwandaka na Nkumbu ya Yesu. Dibuundu *yayi* vwandaka na Nkumbu ya Yesu. Mpe dibundu *yayi* zimbisaka Yawu. Dibuundu *yayi* basikaka, nsungi ya Luther, na “nkumbu yina beno ke zingila, kasi beno kele ya kufwa.” Mpe landilaka kaka na kukulumuka tii nsuka ya nsungi *yayi*; mpe na kati-kati ya nsungi yayi mpe nsungi *yayi* ya kele na mwelo ya kuzibuka ya kutula yina ke vutula dyaka Nkumbu na dibuundu. Ntangu yayi beno tala mbote mpe beno mona kana ya kele Kieleka, na manima beto ke baka yawu awa na Masonuku. Kuna na kati-kati ya bansungi.

<sup>82</sup> Ntangu yayi, wanzio na nkokila mu ke meka na kuzwa yayi kutula na zulu awa samu beto nyonso kumona yawu. Mpe mu ke kwiza mu banza wanzio na manima ya midi mpe kufikula . . . mwa bizizi yina mu zola kuzonzila beno. Mpe kana mosi ya beno kele na disolo, beno nata yawu. To beno baka banote ya beno mpe beno kwenda na yinzo ya babuku to kisika mosi mpe beno baka disolo, mpe beno tanga yawu mpe beno mona kana yayi kele kieleka.

<sup>83</sup> Ntangu yayi nzila ya Ntete. Yinki Yandi ke na kusalaka? Yandi ke na kupesaka bawu mbote.

*Na—na wanzio ya dibuundu ya Ephèse . . . (na Jean sonika; Bima yayi ke tuba yandi yina me simba bambwetete sambwadi na diboko ya yandi ya kibakala, yina ke tambula na kati-kati ya minda sambwadi ya wolo; (ya kele mbote)*

<sup>84</sup> Ntangu yayi nzila ya 2 mpe nzila ya 3, Yandi tumaka bawu:

*Mu zaba bisalu ya nge, mpe bampasi ya nge, mpe mvibudulu ya nge, . . . mutindu ti nge lenda vibidila ve bayina kele yimbi: mpe nge me meka bawu yina ke tuba bawu kele bantumwa, kasi kele ve, mpe me tala bawu bantu ya luvunu:*

<sup>85</sup> Beno me mona, ti kumanga lukwikilu me banda yimeni na kubaka kisika, na nsungi ya ntete. Ya bandaka yimeni kaka kuna; samu ti musolami mpe Dibuundu ya kieleka yina zolaka kubumba balutumumu ya Biblia, mpe kubumba Bandinga yina Yesu tubaka na kimbangi ya Yandi, ba bandaka yimeni na kukatukila nzila. Kima bandaka na kusalama, mpe kuna telamaka milongisi ya luvunu, bantu yina vwandaka longa luvunu, mutindu yankaka na Masonuku, na kumekeke na kukotisa kima to kubwela kima mosi.

<sup>86</sup> Ya kele samu na yina Yandi pesaka luzayikisu yayi na dibuundu mpe tubaka, “Muntu nyonso yina ke katula to ke bwela, ba ke katula ndambu ya yandi na Buku ya Luzingu.” Yina

kele, kuzimbana, mpangi! Beno sakana kaka ve na Ndinga ya Nzambi! Ata kaka nani Yawu ke talisa mpasi to yina Yawu ke talisa mpasi, beno tuba kaka Yawu na mutindu nyonso. Kaka mutindu Yawu kele ya kusonika kuna, beno tala mutindu. Beto kele na nsatu ya kima mosi yankaka ya nene ve, beto kele na nsatu ya nganga-Nzambi mosi ve to kima samu na kutendula Yawu na beto, Nzambi Mpeve-Santu kele mutendudi. Yandi ke pesa ntendulu.

<sup>87</sup> Ntangu yayi, kana beno tala, ba katulaka ntima na bantu ya yimbi mpe talaka baprofete ya luvunu, na manima ya yawu ba talisamaka ya luvunu, na kuvwandaka na mutindu ya kinzambi. Beno me mona mutindu dibuundu bandaka na kukuma ya misiku na kati ya ntangu yina? Bawu bandaka na mutindu ya kuzenga bantu na yisi ya lutwadusu ya Mpeve-Santu, bandaka na kunata bantu na mutindu ya kuseka bawu.

<sup>88</sup> Mbote, Yesu tubaka ve, “Kyese na beno ntangu ba ke talisa beno mpasi samu na dyambu ya ludedomo”? Yandi tubaka ata mbala mosi ve na kubanda kukuma ya misiku. Yandi tubaka, “Beno sepela, mpe beno vwanda na kyese mingi, samu ti bawu talisaka mpasi baprofete yina vwandaka na ntuala ya beno.” Yandi tubaka yawu, ya vwandaka na bakyese, na Matthieu 5, “Kyese na beno!” Mbote, samu na kuzwa bantu na kuseka beno samu ti beno zola Mfumu Yesu, ya kele kaka lusakumunu na kuzwa bawu kutuba yawu. Bawu kele kaka . . . Ntangu bawu ke singa beno, bawu ke na kunataka balusakumunu ya Nzambi na zulu ya beno. Ya ke vutukila bawu, mutindu ya salaka na Balaam na ntangu yina. Ya—ya vutukilaka bawu. Ntangu bawu ke meka na kuseka beno na kuvwandaka Muklisto, mbote, ya ke vutukila bawu, mpe Nzambi ke pesa lusakumunu, samu ti, “Kyese na beno ntangu bantu ke talisa beno mpasi samu na dyambu ya Nkumbu ya Munu.” Samu na dyambu ya Nkumbu ya Yandi, “Kyese na beno!”

<sup>89</sup> Ntangu yayi beto ke tala ti bawu zolaka kubanda mpe kukota na mutindu ya kinzambi.

<sup>90</sup> Ntangu yayi, mu lenda telama kaka awa mpe kutuba kima mosi, beno kwikila mu ke sala. Beno me tala ti na konso réveil . . . Ntangu yayi, bankundi milongi, beno fyongonina yayi. Konso réveil ke basisaka mapasa, kaka mutindu Jacob mpe Rébecca butaka mapasa: Esaü mpe Jacob. Mu zolaka tuba Isaac na kisika ya . . . Isaac mpe Rébecca, na kisika ya Jacob. Isaac mpe Rébecca butaka mapasa. Tata vwandaka santu, mama vwandaka santu, kasi bawu butaka bana zole ya babakala: Esau mpe Jacob.

<sup>91</sup> Ntangu yayi, bawu zole vwandaka misambidi. Kasi Esau, ntangu ya ke kuma na bisalu mpe mavanga, mutindu muntu ya misiku ya mbote, kukondwa ntembe yandi vwandaka mwana ya bakala ya mbote mingi, nzila nyonso, vwandaka ya kulutila Jacob. Beno zaba yawu? Jacob vwandaka kaka mwana ya fyoti

ya bakala yina vwanda kangamaka na mama ya yandi ntangu nyonso. Kasi Esaü vwanda lenda mpe vwanda salaka, yandi vwanda basikaka mpe vwanda kuzwaka musuni ya kibulu na kupesa na papa ya yandi ya kiboba ya mpofu yina vwandaka profete, yandi vwanda mekaka na kukipe yandi. Kasi Jacob vwandaka kaka na kima mosi na dibanza, yandi vwandaka zola bukuluntu! Yandi vwanda kipe ve bilumbu yandi zolaka kangama to nyonso yina yandi zolaka sala, kima ya ngudi na luzingu ya yandi vwandaka bukuluntu! Mpe Esaü vwanda kipe yawu ve.

<sup>92</sup> Ntangu yayi beno ke mona ve muntu ya yinza—muntu ya yinza? Ntangu réveil ke kwizaka, ya kele na bakalasi zole ya bantu yina ke basikaka na konso réveil. Ya kele na muntu ya yinza yina ke kwenda, mpe yandi ke kwiza na autel mpe ke tuba, “Yinga, tata, mu ke ndima Klisto mutindu Mvulusi ya munu.” Yandi ke basika, mpe yinki yandi ke sala? Kima ya ntete beno zaba, yandi ke suka na dibuundu mosi ya mbote ya madidi, ya misiku, samu ti yandi ke banza, “Mbote, kana mu vwanda ya dibundu, mu kele kaka mbote mutindu muntu yankaka yina. Mu kele kaka mbote ve mutindu *Kingandi*? Wapi luswaswanu ya ke sala na yina ntangu nyonso mu ke vwanda ya dibuundu mpe ke sala mfunguna ya munu ya masumu?” Mbote, ya kele na luswaswanu mingi. Beno fwana butuka dyaka. Beno fwana kuzwa bukuluntu.

<sup>93</sup> Mpe Jacob vwanda kipe ve bambala yikwa ba vwanda seka yandi. Yandi vwandaka sosa bukuluntu yina, mpe yandi vwanda kipe ve wapi mutindu yandi zolaka kuzwa yawu.

<sup>94</sup> Ntangu yayi, bantu mingi ke zolaka ve kuzwa bukuluntu samu bawu banza ti yawu kele kaka ya kuzabana mingi ve. Ba zola ve kukulumuka na autel mpe kudila mwa fyoti, to kukwenda kukondwa madya fyoti, mpe—mpe kima yankaka. Bawu—bawu—bawu—bawu zola ve kusala yawu. Bakento mingi...mingi ya, beno zaba, kubongi...kupakula, bawu banza ti kana bawu dila bawu ke katula yawu, bawu fwana tula dyaka yawu. Mbote, bawu...ya kele...Mpe mu zola ve kutuba ti ya kele kuvwenza, mu banza ti ya ke wakana ve mutindu yina, kasi ya kele kieleka. Ba zola kaka Yawu ve. Ba zola Mbutukulu ya Malu-malu ve, samu ti Mbutukulu ya Malu-malu kele mutindu mvindu. Ya kele mutindu mbutukulu nyonso yankaka. Mbutukulu nyonso kele mvindu, mu ke kipe ve kisika ya kele. Kana ya kele na yinzo ya bangulu to na kidikulu, to kana ya kele na kivinga na lupitalu, yina ba me bongisa, ya kele mvindu.

<sup>95</sup> Mpe mutindu mosi kele Mbutukulu ya Malu-malu mvindu! Amen. Ya ke sala beno kusala bima yina beno banzaka ve ti beno ke sala; kutelama na nsongi mosi mpe kubula tambourin, to kuyimba, “Nkembo vwanda na Nzambi! Alleluia! Lukumu na Nzambi! Nkembo na Nzambi!” Mbote, beno ke sala mutindu

kilawu. Ya kele yina ya salaka na bantumwa, ya kele yina ya salaka na mwense Marie, yandi salaka mutindu kento ya kukola malafu. Yandi vwanda mvindu na kati ya bantu, kasi ya ke lombaka mvindu samu luzingu kubasika. Amen!

<sup>96</sup> Kana ti kima kufwa mpe kupola, luzingu lenda kwiza na yawu ve. Kana ti muntu kufwa mpe kupola na mabanza ya yandi mosi, Klisto lenda kota ve na kati ya ntima ya yandi. Ntangu beno ke meka na kubanza na beno mosi, “Ntangu yayi, kana mu belama na autel mpe kutuba, ‘Yinga, Mfumu, mu kele—mu kele muntu ya mbote, mu ke baka Nge. Mu ke futa kikunku ya kumi ya munu. Mu ke sala yayi,’” beno fwana kufwa mpe kupola kaka kuna na mabanza ya beno. Ti Mpeve-Santu kuyala mpe kusala kaka nyonso yina Yandi zola na beno. Beno kuzwa mutindu ya mvindu na yawu. Ya ke wakana ya boma, ya kuvwenza ve, kasi ya kele Kieleka. Ya kele kaka mutindu mu zaba na kulakisa kima samu na kusala beno kubakula Yawu.

<sup>97</sup> Yinki vwandaka ya kulutila ya mvindu na konga yina ya ba-Juif ya buzitu na kilumbu yina, na kumona bantu yayi kubasika kuna na bikoba ya kukukama? Beno zaba yinki kukukama kele? “Huh, huh, uh, uh, uh, uh. . . ? . . .” Bandinga yankaka, mpe ke sala mutindu bantu ya kukola na malafu. “Huh, huh, uh, uh, uh.” Ya kele kaka yina bawu vwandaka sala. Ba ke talana mvindu!

<sup>98</sup> Mpe yandi tubaka, “Bantu nyonso yayi kele ya kifuluka na vinu ya malu-malu?”

Kasi na manima mosi mutindu vutukaka na mabanza ya yandi, yandi tubaka, “Ti yayi kuzabana na beno, mpe beno kuwa bandinga ya munu, bayayi kele ya kukola ve mutindu beno ke banza ti ya kele.” Kasi yandi vutukaka na Masonuku, “*Yayi* kele *yina* ti zonzamaka na nzila ya profete Joël, ‘Mpe ya ke salama na bilumbu ya nsuka,’ tubaka Nzambi, ‘Mu ke tsyamuna Mpeve ya Munu na zulu ya nsuni nyonso.’”

<sup>99</sup> Ya kele mutindu Dibuundu kubutukaka ntete. Bantu yikwa ke kwikila ti Nzambi kele ya kukondwa nsuka? Na yina Yandi lenda soba ve. Mpe kana ya vwandaka dibanza ya Yandi ya Dibuundu na ntonono, ya kele mutindu ya Dibuundu Yandi ke kuzwa na nsuka. Yandi lenda soba ve. Na yawu wapi mutindu beno lenda yingisa kupesana diboko, to kumwangisa mwa maza, to—to kima mosi yankaka yina salamaka kaka ve kuna? Mosi na mosi ya bantumwa vutukaka kaka na yawu.

<sup>100</sup> Na manima ba salaka nyonso yayi. . . Mpeve-Santu kulumukaka na zulu ya bawu, Pierre tubaka, “Beto lenda yimina maza, na kumonaka ti bayayi me kuzwa Mpeve-Santu mutindu beto kuzwaka na ntonono?” Mpe yandi tumisaka bawu na kubotama na Nkumbu ya Mfumu Yesu. Ya kele kieleka.

<sup>101</sup> Paul kwendaka kuna mpe talaka bantu vwandaka boka, vwandaka kuzwa ntangu ya nene, nkonga ya ba-Baptiste yina

vwandaka kembila Nzambi, mpe yandi tubaka, Actes 19, yandi tubaka, “Beno kuzwaka Mpeve-Santu tuka beno kwikilaka?”

Bawu tubaka, “Beto zaba ve ti ya kele na kima mutindu Mpeve-Santu.”

Yandi tubaka, “Wapi mutindu beno botamaka?”

Bawu tubaka, “Beto botamaka na nzila ya muntu mosi yina botikaka Yesu, Jean Mubotiki.”

<sup>102</sup> Yandi tubaka, “Yinga, ya ke simba dyaka ve.” Beno me mona? Pierre tulaka yawu kidimbu na Kilumbu ya Pantekote. Yandi vwandaka na fungula. Beno me mona?

Yandi tubaka, “Ya ke simba dyaka ve, beno fwana botama dyaka.” Na yawu yandi botikaka dyaka bawu, na Nkumbu ya Mfumu Yesu Klisto. Tentikaka maboko na zulu ya bawu, mpe bawu kuzwaka mutindu mosi ya bandandu yina bawu kuzwaka kuna na ntonono. Mpeve-Santu kubwaka na zulu ya bawu, ba bandaka na kuzonza na bandinga mpe pesaka baprofesi.

<sup>103</sup> Ntangu yayi, yina vwandaka Dibuundu na nzila ya nsungi. Ntangu yayi, ya bandaka kaka awa na ntonono.

“Mu zaba mvibudulu ya nge. Mvibudulu ya nge ya boma, Mu zaba yawu . . . Ntangu yayi beno bambuka moyo, Mu kele Yandi yina ke tambula na kati-kati ya minda. Mu zaba mvibudulu ya nge, mpe kisalu ya nge, mpe mpasi ya nge, mpe luzolo ya nge, mpe nyonso yankaka. Mu zaba nyonso yina nge me sala. Mpe Mu zaba ti nge me meka bantu yayi yina ke bokila bawu mosi ‘baprofete, bantumwa,’ mpe nge me tala ti ba kele bantu ya luvunu.” Oh, ya kele kieleka ngolo, mutindu yina ve? Mu kele ve mfumu ya yawu, Yandi kele. Yandi tubaka ti bawu vwandaka bantu ya luvunu.

<sup>104</sup> Kasi Biblia ke tuba, “Beno meka muntu. Kana ya kele na kati ya beno mosi yina kele ya kimpeve to profete, to yina yandi ke tuba kele, Munu Mfumu Munu mosi ke talana na yandi. Mu ke zonza na yandi na ba-vision, mpe na bandosi. Mpe kana yina yandi ke tuba kusalama, kuna beno kuwa yandi; beno vwanza na boma ya yandi ve, beno me mona, samu ti Mu kele na yandi. Kasi kana ya salama ve, kuna beno kuwa yandi ve, yandi kele ve na Ndinga ya Munu.” Beno me mona, kana ya kele Ndinga ya Yandi, ya ke salama.

<sup>105</sup> Ntangu yayi, bawu talaka ti bantu yayi vwandaka tambula ve landila Biblia. Beno me mona, ba vwandaka meka na kuzwa kima yankaka. (Mu zola beno kuyindula na yawu ntangu yayi, samu beto ke kuma na ndambu kaka na baminuti fyoti.) Ntangu yayi, na manima Yandi tubaka, “Mu me mona yina nge me . . . ti nge me kuzwa mvibudulu, mpe mvibudulu mpe . . . na bawu. Nge me meka bawu, mpe me tala ti bawu kele ve bantumwa. Ba kele yawu ve.”

<sup>106</sup> Ntangu yayi, mutindu mu vwandaka me tuba na kubanda, ntete beto banda dyaka na yayi, konso réveil ke basisaka mapasa

zole. Mosi kele muntu ya kimpeve; mosi yankaka kele muntu ya yinza ya ntoto, “Mu me kuma ya dibuundu, mu kele kaka mbote mutindu muntu nyonso.” Mpe ya kele yina réveil yayi ke basisaka. Beno tala yina kele, réveil nyonso. Ya kele yina ya Luther basisaka, ya kele yina ya Irénée basisaka, ya kele yina ya Santu Martin basisaka, ya kele yina ya Colomba basisaka, ya kele yina ya Wesley basisaka, mpe ya kele yina ya Pantekote basisaka. Kaka mutindu mosi.

<sup>107</sup> Beno me mona mutindu bawu me bika? Me tunga mabuundu ya bawu, mpe me landila na kukatukila, mpe bisika ya nene ya mbote mpe (oh, Nzambi ya munu!) kutelama kuna mpe kuvutukila Credo ya Bantumwa. “Mu ke kwikila na Dibuundu ya Katolika ya Santu ya Rome, mpe kubundana ya basantu.” Muntu nyonso yina ke kwikilaka na kubundana ya basantu kele muntu ke zonzaka na bampeve. Kima nyonso yina ke bundanaka na muntu ya kufwa kele ya dyabulu. Ya kele kaka kieleka. Ya kele na muvukisi mosi kati-kati ya Nzambi mpe muntu, Muntu yango kele, Yesu Klisto. Ya kele kieleka. Ya kele yina Pierre tubaka. Mpe beno bantu ya Katolika ya luzolo beno ke bokila yandi “pape ya ntete, mpe Pierre vwandaka pape ya ntete yina tambulaka na Yesu.”

<sup>108</sup> Mpe kuna yandi tubaka, “Ya kele ve na muvukisi yankaka na kati-kati ya Nzambi mpe muntu.” Mpe bayayi, beno kele na mafunda kumi ya bayankaka bubu yayi. Samu na yinki ya me soba mingi, kana dibuundu kele ya kubwa ve mpe me soba ve? Mpe bamisa ya beno nyonso kele ya kutuba na Latin samu yawu soba ve. Yinki salamaka? Wapi kisika beno me talaka Credo ya Bantumwa na Biblia? Kana bantumwa vwandaka na credo mosi, ya vwandaka “Beno balula ntima, mpe beno botama mosi na mosi ya beno na Nkumbu ya Yesu Klisto samu na lemvo ya disumu ya beno.” Ata credo yankaka mu kuwaka bawu kuzaba to vwanda tangaka mpe kima mosi yankaka.

<sup>109</sup> Kasi ntangu ya ke kuma na “Mabuundu ya santu ya Rome,” mpe bima nyonso yayi yankaka, mpe “Nzambi Tata ya Ngolo Nyonso yina bumbaka mazulu mpe ntoto,” yina kele bulawu. Beno me mona? Ya kele kieleka. Ya kele ve na kati ya Biblia. Ya kele ve na kima mutindu yina na kati ya Masonuku. Ya kele credo ba me sala bawu me yidika. Kasi ya kele . . . bisambu nyonso mpe nyonso kele bima ya kusala.

<sup>110</sup> Beto lenda mona bubu yayi ti ba-Protestant ya beto, ntangu beto ke na kukota na yawu awa, basikaka kaka na yawu. Mpe kaka mutindu Billy Graham tubaka Lumingu, “Bantu me vwanda na kati ya luvunu mingi ti bawu ke banza ti bawu kele kaka na kieleka na yina bawu kele na foti.” Ya kele ya kulunga. Ya kele kieleka. Mu kele na kyese ti mu kele . . . Samu ti mu zaba Billy Graham kuzwaka Mpeve-Santu na yisi ya George Jeffries na lweka kuna, kasi mosi ya bilumbu yayi yandi ke basika na yawu. Nzambi ke na kusadilaka yandi kaka kuna ntangu yayi,

samu yandi ningisa kimfumu yina ti muntu ve yankaka lenda na mpasi kukota. Kasi beno lenda mona kulonga ya yayi, ti ya kele ve na kima mosi na manima ya yawu, samu na bayankaka ya ba-Baptiste yayi awa yina ke pesanaka maboko. Yinga, tata!

111 Ntangu yayi:

*Mu zaba bisalu ya nge, . . . mpe mvibudulu ya nge, . . . mutindu ti nge lenda ve . . .*

112 Beto mona ntangu yayi, mu ke . . .

*Mu zaba bisalu ya nge, mpe mpasi ya nge, mpe mvibudulu ya nge, . . . mutindu nge lenda vibidila ve bayina kele yimbi: mpe nge me meka bawu yina ke tuba ti bawu kele bantumwa, kasi kele ve, mpe me tala bawu bantu ya luvunu:*

113 Yandi talaka ti bawu vwandaka bantu ya luvunu. Wapi mutindu bawu zabaka yawu? Ba vwandaka ve na ngwisani na Ndinga.

114 Ntangu yayi, kana muntu ke tuba ti “Biblia yayi ke tuba na Hébreux 13:8, ‘Yesu Klisto, mutindu mosi mazono, bubu yayi, mpe kukonda nsuka,’” muntu tuba, “Ah, bilumbu ya bimangu me luta,” kuna muntu yina kele muntu ya luvunu.

115 Kana Biblia me tuba, “Beno balula ntima, mpe mosi na mosi ya beno kubotama na Nkumbu ya Yesu Klisto samu na lemvo ya masumu ya beno,” mpe kisika nyonso na Biblia ke tuba kima mosi, mpe muntu nyonso yina botamaka ntete na—na ntangu ya Biblia kubotamaka na Nkumbu ya Yesu Klisto, mpe ti yandi tumisa bawu na kubotama, na kumwangisa mwa maza, to kima mosi mutindu yina, muntu yina kele muntu ya luvunu, yandi ke zabana profete ya luvunu.

116 Mu banza ti mu ke na kunyongisaka bantu ve, kasi mu . . . Mpangi, beno—beno lenda ve kubondila Yayi, ya kele ntangu, beno katula ba-gant mpe beno simba Nsangu ya Mbote. Beno me mona? Ya kele Kieleka.

117 Ntangu yayi, beno talisa munu kima ya mutindu yankaka. Beno talisa munu kisika muntu mosi kubotamaka ntete na mutindu mosi yankaka ti na Nkumbu ya Yesu, beno me mona, na ngaanda ya dibuundu ya Katolika. Na yawu kana beno botamaka mutindu yina, beno kele ve na dibuundu ya Miklisto, beno kele na dibuundu ya Katolika samu ti beno kele ya kubotama. Na *Sunday Visitor* ya bawu mosi, katekisima ke pesa, kyuvu, “Ya ke vwanda na ba-Protestant yina kuzwaka mpulusu?” Ya ke tuba, “Mingi ya bawu, samu ti ba kele na mbotika ya beto mpe bima mingi mutindu yina.” Ya ke tuba, “Bawu ke tuba na yina ke tala Biblia, mpe Biblia ke tuba ‘beno botika na Nkumbu ya Yesu Klisto,’ mpe beto ke katula yawu kuna mpe me tula yawu ‘Tata, Mwana, mpe Mpeve-Santu’ mpe bawu me kota na yawu.” Kieleka. Beno me mona? Ve—ve . . .



Ya kele ve—ya kele ve mbotika ya Miklisto, ya kele mbotika ya Katolika.

118 Beno kuwaka munu nkokila yankaka yina, “Beno me kuzwaka ntete mbotika ya *Miklisto*?” Mbotika ya *Miklisto*, Klisto, “Yeu Klisto,” ve na kosalu mosi.

119 Ntangu yayi, nzila ya 3 ntangu yayi. Mbote mingi, nzila ya 2 mpe ya 3. Ntangu yayi nzila ya 3:

*Mpe me ndima, mpe vwandaka na mvibudulu, mpe samu na dyambu ya nkumbu ya munu me tala mpasi, mpe me lembe ve.*

120 “Samu na Nkumbu ya Munu.” Beno me tala ba vwandaka na mvibudulu? Ba talaka mpasi samu na yinki? Na Nkumbu ya Yandi. Beno mona Nkumbu yina kukangama na dibuundu yango? Ntangu yayi beno tala mbote yawu, na yina beto ke tala yawu nzila nyonso ya sabala, mutindu yawu ke zimbana mpe ke banda na kulwata nkumbu yankaka. Beno me mona? “*Me vwanza na mvibudulu, me tala mpasi, mpe nyonso, mpe samu na dyambu ya Nkumbu ya Munu.*” Yandi. . . Bawu monaka mpasi samu na Nkumbu ya Yandi, samu na kubumba Nkumbu ya Yesu Klisto na zulu ya dibuundu nyonso, na zulu ya kima nyonso yankaka.

121 Ti Yawu vwanza ya ntete, “Nyonso yina,” Biblia me tuba, “Nyonso yina beno ke sala na kuzonza to na bisalu, beno sala yawu na Nkumbu ya Yesu Klisto.” Ya kele kieleka? “Nyonso yina beno ke sala na kuzonza to na bisalu.” Kana beno ke kwelisa, beno ke kwelisa muntu; kana beno lenda ve, kana ba kele ya kufuluka na maketi-kefi na makwela ya bawu, beno kwelisa bawu ata fyoti ve. Beno me mona? Kana beno lenda ve kutuba na kimpwanza, “Mu ke samuna ti beno kele bakala mpe kento na Nkumbu ya Yesu Klisto,” beno bika bawu kukwenda. Mbote mingi. Kana beno zola kubotika bawu, beno botika bawu na Nkumbu ya Yesu.

122 Kana beno fwana sala kima yina beno lenda ve kusala na Nkumbu ya Yesu, beno bika yawu swi! Muntu mosi ke tuba, “Kunwa fyoti.” Beno lenda ve kusala yawu na Nkumbu ya Yesu, na yawu beno bika yawu swi! Muntu mosi ke tuba, “Bula fyoti bakalati.” Beno lenda ve kusala yawu na Nkumbu ya Yesu, na yawu beno bika yawu swi! Na kusakana mosi ya fyoti, ya mvindu, ya mambu ya yimbi na partie ya beno ya bridge, kana beno lenda tuba yawu ve na Nkumbu ya Yesu, na yawu beno bika yawu swi! Beno me mona? Beno lenda ve kulwata bakupe na Nkumbu ya Yesu, na yawu beno bika yawu swi! Mu lendaka landila, kasi beto. . . beno zaba yina mu ke na kuzonzila. Mbote mingi. Beno lenda sala yawu ve. Yina beno lenda sala ve na Nkumbu ya Yandi, beno bika yawu kaka! Samu ti, Yandi tubaka, “Nyonso yina beno ke sala na kuzonza mpe na bisalu, beno

sala yawu nyonso na Nkumbu ya Yesu Klisto.” Mbote mingi, ntangu yayi.

<sup>123</sup> Ntangu yayi beto ke kota na . . . Ya kele . . . Yandi zangulaka bawu na yawu. Ntangu yayi mu ke zonzila na dyambu ntangu yayi na kapu ya 4 . . . to nzila ya 4, na kisika.

*Kasi mu ke telemina nge fyoti, samu ti nge me bika zola ya nge ya ntete.*

<sup>124</sup> Oh! “Mu ke telemina nge na kima mosi. Nge me vwanda na mvibudulu, nge me simbidila samu na Nkumbu ya Munu.” Ya ke vwanda kaka kima ya mbote ve samu na tabernacle yayi bubu yayi? Yinga, tata! “Beno me vwanda nyonso ya kulunga, mpe beno me vwanda na mvibudulu mingi, mpe me kanga-ntima bilumbu mingi, kasi kima ya yawu kele . . . Nge me simbidila samu na Nkumbu ya Munu. Mu me zola nyonso yina. Mu—Mu ke zangula beno samu na yawu, ya kele nyonso mbote. Mpe Mu me mona ti nge me meka bawu yina ke tubaka ti bawu kele bantumwa mpe nyonso yankaka, mpe me tala ti ba kele bantu ya luvunu, bawu ke tambula ve kintwadi na Ndinga. Mu—Mu ke zola nyonso yina. Kasi ya kele na kima mosi Mu kele ya kutelemina nge, mpe ya kele ti nge me bika zola ya nge ya ntete. Beno me bika zola yango yina vwandaka na beno na ntama samu na balukutakanu yango ya mbote ya mutindu ya ntama ya Mpeve-Santu, mpe beno me banda mutindu kuvutuka manima na kati ya misiku, na kukwizaka na “Tata ya beto . . .” Bulawu! Beno me mona?

<sup>125</sup> Na buyinza nyonso yayi awa, mpe muntu fwana kwiza ya kulwata robe mosi ya nene (beno zaba, na kuyimba na chorale, beno zaba), mpe kubongisa nyonso na zulu ya nsuki ya bawu mpe nyonso, mpe kupakula mingi bisika nyonso na kizizi ya bawu, mpe bawu ke yimba mutindu mu zaba ve yinki.

<sup>126</sup> Awa ntama mingi ve, kana ya vwandaka ve lukutakanu ya Oral Roberts, kieleka mu zolaka basisa nkonga mosi ya bantu. Mu vwandaka—mu vwandaka na lukutakanu ya Bantu ya Mumbungu mpe ya vwandaka salama . . . beto vwandaka ve . . . nkokila yango mu zolaka longa. Ba lendaka ve kusala yawu kuna na hotel, mpe ba nataka munu na—na yinzo ya nene ya Orala Roberts. Mpe na yina mu vwandaka ya kuvwanda na bilo ya Oral, ya vwandaka na nkonga ya bana ya ba-Pentecotiste (oh, bantwenya ya babakala mpe ya bakento, ya bamvula kumi na sambanu, kumi na sambwadi, kumi na nana) bawu nyonso ya kutelama na ngaanda kuna; pene ya makumi tatu to makumi yiya ya bawu zolaka yimba mutindu mosi ya fyoti . . . yina ke wakana samu na munu mwa mutindu ya nkotolo mosi ya muntu mosi mutindu Becky vwandaka zonzila, Tchaikovsky to mosi ya bawu ya mutindu ya bima mutindu yina; mu zaba ve, mosi ya bawu ya mutindu ya bankunga, nkunga ya classique. Mpe awa ba zolaka, bankundi zolaka lokota makabu na lukutakanu, mpe

mosi na mosi ya bayayi vwandaka kwenda mpe vwandaka na bakopa ya fyoti, vwandaka sala mutindu ti ba vwandaka ya kufwa meso mpe vwandaka sala bansaka nyonso mpe vwandaka landila na yina beno me kuwaka ntete ve, na kati-kati ya bana ya babakala mpe bana ya bakento, mpe vwandaka zonzila mutindu nyonso. Mpe bana ya bakento yango na mpemba na zulu ya bawu, yina ba zolaka lenga na kutala yinzo ya nene ya Oral. Mpe kuna ba vwandaka mutindu yina, mpe vwandaka bokila bawu mosi “ba-Pentecotiste.” Ba zimbisaka zola ya bawu ya ntete!

<sup>127</sup> Mu ke wisana na David duPlessis, “Nzambi kele ve na mitekolo.” Ve, tata! Beto kele na mitekolo ya ba-Méthodiste. Beto kele na mitekolo ya ba-Baptiste. Beto kele na mitekolo ya ba-Pentecotiste. Kasi Nzambi kele ve na mosi! Beno kele bana ya babakala mpe bana ya bakento. Beno lenda kota ve samu mama ya beno to papa ya beno samu ti bawu vwandaka babakala mpe bakento ya mbote, beno fwana futa ntalu mosi bawu salaka. Beno fwana kubutama kaka mutindu bawu vwandaka. Nzambi kele na ata fyoti ve ya mitekolo. Beno kele mwana ya bakala to mwana ya kento; to, beno kele ve mutekolo ya bakala, yina kele kima mosi ya kieleka.

<sup>128</sup> Mu kwendaka na lukutakanu mosi kuna, mpe bawu kuna . . . na dibuundu mosi ya mbote ya Assemblée ya Pentecote. Bakala, beno zolaka mona bakento yango kukima ntangu bawu monaka munu kukota; na bakupe yango, bansuki ya kuzenga nkufi, mpe ya kulwata mwa bima yango ya nkufi, mutindu saucisse na kutala, beno zaba, ya kukangama na nzutu na ba-robe yango mutindu yina, bakento ya Pantekote, ya kulwata sexy.

<sup>129</sup> Beno ke pesa mvutu samu na yawu, na Kilumbu ya Lufundusu. Beno ke vwanda ya kuzaba dyambu ya kusalaka pité, Yesu tubaka, “Muntu nyonso yina ke tala na kento samu na kulula yandi, yandi me sala yimeni pité na yandi na kati ya ntima ya yandi.” Mpe kana beno talana beno mosi na bakala mutindu yina, nani me zaba dyambu? Beno to bakala? Beno vwanda mbote! Beno kima kotalana ya kieleka ya dyabulu! Beno me mona? Beno me tala.

<sup>130</sup> Yinki ba salaka? Ba zimbisaka luzolo ya bawu ya *ntete*. Oh, beno lenda ve kuzwa bawu na nsongi ya nzila na tambourin samu na kubula maboko ya bawu mpe kukembila Nzambi. Oh, ve! Bawu ke yimba mutindu mosi ya kima ya classique na nkonga ya ba-robe na zulu ya bawu. Beno me mona, ba me zimbisa luzolo ya bawu ya *ntete*. Beno tala yina kele dyambu na dibuundu ya ntete. Beno me mona?

<sup>131</sup> Ba fwana sala kaka mutindu yinza. Ba fwana lwata mutindu yinza, kotalana mutindu yinza, kusala mutindu yinza. Mpe kele na star ya bawu ya televizyo ya luzolo, beno zaba, ba lenda kaka ve kubika kumona yawu. *Beto Zola Susie* to kima mosi yankaka, beno zaba, ba fwana mona kaka yawu. Bawu ke vwanda na yinzo

ke manga kukwenda na lukutakanu ya bisambu mpe nyonso samu na kumona yawu. Kana ba vwanda ve, ba ke dasukila pasteur ya bawu na mutindu ya mbote, samu na kubika bawu kubasika na ntangu tii manaka yina ke banda samu bawu kuma na yinzo samu na kumona yawu. Zola ya yinza kulutila na zola ya Nzambi!

132 Oh, ya kufuluka na misiku, ba lenda ve kutuba, “Amen!” diaka ve. Oh, la la, ya ke bebisa mwa kupakula. Beno me mona? Ba kele dyaka ve na Yawu. Yina kele ba-Pentecotiste. Ya kele ve ba-Baptiste. Ba kuzwaka Yawu ata mbala mosi ve na kubanda, ba-Presbytérien. Mu ke na kuzonzila na ba-Pentecotiste. Ya kele kieleka. Mu zaba ti ya ke sala boma mingi na ntima, mpangi, kasi beto zola mbutukulu na manima ya kima mosi yayi; fwana nata lufwa ntete beno kuzwa mbutukulu. Beno me mona? Beno me mona? Ya kele Kieleka. Kasi kuna beno kele, me bika zola ya beno ya ntete. Mu . . .

133 Kana Nzambi vwandaka ya kutelemina yawu na dibuundu *yayi*, Yandi ke telemina yandi *yina* mpe! “Samu nge me bika zola ya nge ya ntete, Mu kele ya kutelemina nge na yawu. Mu ke telemina nge na dyambu mosi, tala dyambu ya Munu. Nge na ntangu ya ntama kuzwaka ntangu ya nene, kasi nge—nge me bika yinza kubanda kukota na malembe, mpe nge fwana sala fyoti na mutindu ya misiku. Nge kele dyaka na Nkumbu ya Munu, mpe nge ke na kusalaka dyaka bima yina kele ya kulunga, mpe nge kele na mvibudulu mingi mpe nyonso yankaka, mpe kisalu ya nge, nge kele mutindu mulet, nge ke sala kaka na ngolo mpe ke sala.”

134 Oh! Oh! Oh! Beno me mona, beno me bika lemvo mpe lukwikilu mpe ngolo, samu na kusoba yawu na kisalu ya ngolo mpe bisalu. “Mbote, mu ke tuba na nge Mpangi Branham, mu—mu ke sadisaka konso mufwidi ya kento yina mu lenda.” Mbote, ya kele kima ya mbote, mu ke zangula beno samu na yawu. Kasi wapi kisika kele zola yango ya ntete yina vwandaka na beno na ntama? Uh-hum, uh-hum. Wapi kisika kele kyese yina vwanada vwanada na beno? Mutindu David dilaka kilumbu mosi, “O Mfumu, vutula munu kyese ya mpulusu ya munu.” Wapi kisika kele balukutakanu ya kisambu ya mpimpa nyonso, mpe masa ya meso na matama ya beno? Oh, la la, Biblia ya kufuluka na fundu-fundu mpe ya kufuluka na yinzo ya nkala-bumi na zulu ya Yawu. Beno ke tanga masolo ya yimbi ya zola, mpe mambu mpe bima; mpe bima yina lenda mpe ve kuzwa muswa ti ba samuna yawu kasi kubasisa yawu samu na dizala, mpe beto bantu ya Pantekote ke lokota yawu mpe ke kubwa na zulu ya yawu mutindu nkonga ya banzini na dizala. Ya kele kieleka. Oh, kyadi! Yina beto kele na yawu nsatu kele: Kuvutuka na zola ya beto ya ntete! Kuvutuka na Pantekote! Oh, mu ke sala mbote na kubasika kuna. Mbote mingi. Kasi, beno ke bakula, “Na kubikaka zola yina ya ntete.”

135 Nzila ya 4, nzila ya 5 ntangu yayi. Malongi, nzila ya 5, malongi: “Beno bambuka moyo mpe beno balula ntima!” Beno me mona?

*Na yawu bambuka moyo na kisika nge me kubwa, . . .*  
 (Wapi kisika nge me katuka? Na pantekote nge kubwaka tii kisika nge kele ntangu yayi, nge kele retrograde) . . .  
*mpe balula ntima, mpe sala bisalu ya nge ya ntete;*  
 (vutuka dyaka na pantekote) . . . *to kana ve mu ke kwiza na nswalu na nge, mpe ke katula mwinda na ya y-a-n-d-i . . .*  
 (Beno me mona nani ya kele, mutindu yina ve?) . . .  
*na kisika ya yawu, kana ti nge balula ntima.*

136 Na bampova yankaka, kana beno kele na pasteur ya kufuluka na Nzambi, ya kufuluka na Mpeve-Santu, mpe ti beno meka na kulakisa yandi musapi ya beno, kutuba, “Mbote, kana yandi tuba kima na yina me tala kulwata makwela ya beto ya chorale, kana yandi tuba kima na yina me tala kupakula ya beto, beto ke basisaka yandi kaka.” Beno tala boma ve, Nzambi ke sala yawu ntete beno kuzwa siansi ya kusala yawu. Yandi ke basika mpe ke longa na matadi na bala-bala ntete yandi baka nzila yankaka na mutindu ya kima mosi yina. Kana beno kele na pasteur ya kieleka yina ke tubaka na beno Kieleka, beno fwana pesa lukumu na Nzambi mpe beno vwanda na Kimpeve, mpe beno kembila Nzambi, na kuzabaka ti beno ke vwanda ya kuzimbana kana beno sala ve. Beno me mona?

137 Kasi bantu bubu yayi ke zingaka mutindu bawu vwandaka kwenda . . . ti yayi kele kaka kima yina vwandaka, “kuzinga na zulu ya ntoto, kaka yina.” Beno ke bakula ve ti beno kele na moyo yina ke katuka awa mpe ke kwenda kisika. Mpe beno ke kangisa nsuka ya beno kaka awa, mutindu beno ke zinga mpe mutindu beno ke sala, ke kanga bimbeni, mpe ke vwanda yimbi, mpe nyonso, mpe na manima kukima na dibuundu. Oh, kyadi! Fiu! Nsoni na beno.

138 Beno ke nata nsoni na—na zulu ya dyambu ya Klisto. Ya kele kieleka ve? Beto ke salaka yawu ve? Bantu yina ke tekaka malafu ya kuyimina ke salaka mpasi ve na Dibuundu; *yawu* ve. Ya kele ve ndumba ke salaka mpasi na Dibuundu. Ya kele bantu yina ke tubaka kuvwanda Miklisto ya kele yina ke salaka mpasi na Dibuundu. Beto zaba yina kele muntu ke tekaka malafu ya mayuya mpe yina kele ndumba. Ntangu bampangi ya beto ya bakento ke lwataka mutindu ndumba, yina kele mutindu yankaka, *ya* kele yina ke salaka mpasi na Dibuundu. Ntangu muntu ke kunwa mutindu muntu ke tekaka malafu ya mayuya, mbote, kuna, yina kele yina ke salaka mpasi na Dibuundu. Ba ke tuba kuvwanda Miklisto mpe bawu ke sala yina. Bantu ke tala na beno yina nkumbu . . . “Ti yandi yina mpe ke bokila Nkumbu ya Yesu Klisto kukatukila disumu.” Beno me mona? Beno vwanda ntama na yawu.

139 Oh, beto kele ntama, bankundi. Munu, beno, beto nyonso, beto kele—beto kele ntama na yina Klisto zola beto kuvwanda. Mpe kaka awa na kilumbu yayi ya kele ntangu ya kutula na lweka disumu nyonso yina ke kanga beto na malembe, mpe ti beto kima na kukangaka ntima na yina kele ya kutula na ntwala ya beto. Milongi, ya kele kieleka, bankundi. Ya kele kieleka kaka.

140 “Beno bambuka moyo mpe beno balula ntima, to Mu ke katula Nsemo ya mbwetete na kisika ya yawu.” Yinki kele kisika ya yawu? Na Dibuundu. “Kasi kana beno balula ntima ve mpe beno vutuka na kisika beno vwandaka na kisika ya ntete, Mu ke katula pasteur ya beno na kati ya beno mpe ke nata yandi na ngaanda ya kisika ya yandi; Mu ke tula yandi kisika yankaka kisika ya yandi. . . kisika Mu ke lakisa Nsemo ya Munu yina ke lezima.” Hmm! Yina vwandaka ve nene?

141 Ya me kuma ntangu samu mabuundu kubalula ntima. Ya me kuma ntangu samu ti Pantekote kukatula mingi ya mwa bizabi yina ke sema yayi na zulu ya ba-chaire, mpe kukotisa milongi ya ntangu ya ntama kuna bayina ke tuba na beno Kieleka; ve bayina ke bula beno fyoti na manima mpe ke sadila dibuundu samu na tike ya madya, difuta ya nene, mpe kima ya mutindu yina, mpe psychologie, mpe mwa kukima na zulu ya bampunda, mpe madya ya nkokila, mpe nyonso yankaka yina. Ya me kuma ntangu ya kuvutuka na Nsangu ya mbote. Mu ke kipe ve lutangu ya fyoti beno kele, “Kisika zole to tatu me vukana, Mu ke—Mu ke vwanda na kati-kati ya bawu.”

142 “Beno balula ntima, kana ti Mu kwiza mpe kukatula mwinda; ke fidisa yandi ntama, kulezima nsemo ya yandi kisika yankaka.”

Ntangu yayi nzila ya 6. Ntangu yayi awa kele na yina beto ke dyambu mpasi. Ntangu yayi, kana ti beno balula ntima, Yandi ke kwiza mpe ke katula pasteur.

*Kasi yayi kele na nge, . . .*

143 Ntangu yayi, beno bambuka moyo. Oh, beno kondwa yayi ve ntangu yayi. Yayi ke kanga nyonso yankaka ya yawu kintwadi, tii na yayi beto kele. . . nsungi beto kele ntangu yayi. Muntu nyonso ke tala mbote, na kubanda? [Dibuundu me tuba, “Amen.”—Mu.] Beno ke na kulandaka ntangu? [Dibuundu me tuba, “Ve.”] Mbote mingi, ntangu yayi. Mbote mingi, beno vingila kaka mwa fyoti kuna. [Mpangi mosi ya bakala na kati ya dibuundu me tuba, “Vwanda mpimpa nyonso.”] Ntangu yayi. . . Matondo na nge.

*Kasi yayi kele na nge, (Ba vwandaka na kima mosi kuna, mutindu yina ve? Ntangu yayi, yinki vwandaka na bawu?) ti nge yina bisalu ya ba-Nicolaïte, yina mpe mu ke yinaka.*

144 “Nge yina bisalu yango ya ba-Nicolaïte.” Na kuvwandaka na kutanga na zulu kuna bubu yayi, mu sonikaka kima mosi awa

na zulu ya yawu, mu zola beno kuwa mbote ntangu yayi, ya kele na mwa ba-page awa. Nzila ya 6, balukumu mpe kuwisana; ya kele, Nzambi mpe Dibuundu ke wisana na zulu ya kima mosi, ti bawu “ke yina bisalu ya ba-Nicolaïte”; Vinu ya kieleka, Vinu ya kieleka, Dibuundu ya kieleka yina vwandaka na dibuundu yayi ya Ephèse.

<sup>145</sup> Ntangu yayi, beno bambuka moyo, konso dibuundu kele na misiku ya yawu mpe konso dibuundu kele na bimpeve ya yawu. Ya kele mapasa yina ke butamaka na konso réveil mpe ke zingaka na konso dibuundu. Ba bandaka kaka na nsungi *yayi* mpe ke suka na nsungi *yayi*. Mpe na nsuka, bantu ya misiku nataka yawu tii na Nsungi ya Thyatire, mpe Luther tulaka dyaka yawu na ngaanda. Mpe ntangu yayi yawu ke na kuvutukaka kaka dyaka. Beno lenda mona nsambulu ya misiku? Ya kele ve na luswaswanu na kati-kati ya yawu na mutindu ya Katolika. Ya kele kima mosi. Konso organisation me kufwa bantu kaka na kati ya yawu. Nzambi ata mbala mosi ve bongisaka Dibuundu ya Yandi. Ya kele kaka yina ba vwandaka meka na kusala awa. Mpe beno tala mbote mpe beno mona ntangu yayi kana ya kele kieleka ve, ya ke talisa kaka beno mutindu organisation kele nsingulu. Ya vwandaka—ya vwandaka ya nzenza na Dibuundu ya malu-malu, Dibuundu ya Ngwisani ya Malu-malu. Beno me mona?

*Kasi . . . nge . . . Kasi yayi kele na nge, ti nge yina bisalu ya ba-Nicolaïte, yina mpe mu ke yinaka.*

<sup>146</sup> Vinu ya kieleka yinaka bisalu ya misiku ya ba-Nicolaïte, mutindu mosi salaka Nzambi. Yina vwandaka bisalu na dibuundu ya Ephèse, kumaka malongi na dibuundu ya Pergame. Na Ephèse, dibuundu ya ntete, ya vwandaka bisalu, na dibuundu yina vwandaka landa ya kumaka malongi. Beno lenda kuwa yawu? Beno lenda bakula yawu ntangu yayi? Ya vwandaka bisalu na Ephèse, mpe beno tala mbote, awa na lweka ya Pergame ya me kuma malongi. Ya bandaka kaka awa na nzutu ya mwa bébé. Ntangu yayi, na minuti mosi beto ke tala yinki ya vwandaka. Awa kele *bayingo* ya Paul, “bisalu ya ba-Nicolaïte.”

<sup>147</sup> Ntangu yayi yina . . . Beto fyongonina mpova yango mpe beto tala yina beto ke kuzwa ntete beto kwenda na ntwala. Mpova *Nicolaïte* kele mutindu kima ya nzenza samu na munu. Mu me baka lexique nyonso ya Grec yina mu—mu lenda kuzwa. Nicolaïte me katuka na mpova *Nicko*, N-i-c-k-o. Beno vingila, mu banza ti mu sonikaka yawu awa. N-i-c-k-o, *Nicko*, yina zola kutuba “kununga to kubebisa.” Nicolaïte, “kubebisa to kununga misambidi.” Yina bawu vwandaka meka na kusala awa vwandaka kumeka kubaka dibuundu kisika Nzambi vwandaka na ba-pasteur, mpe kisika Mpeve ya Nzambi vwandaka sala na makabu na kati ya Dibuundu ya Nzambi ya moyo, mpe, bawu vwanza kuzwa malongi yina ke banda ti bawu zolaka kuzwa mwa banganga-Nzambi, mpe ba-èveque,

mpe ba-pape, mpe nyonso yankaka yina. Ti, Nzambi tubaka, Yandi yinaka! Yandi ke yina dyaka yawu bubu yayi. *Nico-laïte*, (*Nicko*, “kununga”) to, “kubebisa misambidi.” *Misambidi* kele “dibuundu.” Bantu yikwa zaba ti misambidi kele dibuundu? Mbote mingi, “Kubebisa to kununga, to kubaka kisika ya misambidi.”

<sup>148</sup> Na bampova yankaka, kubaka busantu nyonso, ngolo nyonso ya dibuundu, mpe kutula yawu na zulu ya banganga-Nzambi; “Kubika dibuundu kuzinga mutindu yawu ke zola, kasi nganga-Nzambi kele yina kele ya santu.” Kukatula Mpeve-Santu na bantu na bidimbu mpe mambu ya ngitukulu yina ke landa bawu, mpe kukatula yawu mpe kupesa bawu kinganga ya santu. Kukatula Mpeve-Santu mpe kusobasana Yawu samu na kinganga-Nzambi. Beno me mona yinki ya vwandaka? Ya vwandaka . . . Yawu na nsuka kumaka . . . Na dibuundu *yayi* awa, ya vwandaka bisalu; mpe na kisika *yayi* ya kumaka malongi; mpe na Thyatire, ya vutukaka. Mpe ntangu Luther kwizaka, ya landilaka ve na kuvwanda mutindu yina, ya vutukaka kaka mpe salamaka dyaka: ba-bishop, ba-cardinal, ba-archbishop. Nani na yinza kele yintu ya Dibuundu ya Nzambi kasi Yandi Yandi mosi ve? Amen! Fiu! Ntangu yayi mu ke na kumitala mukwikidi. Ba fidisaka Mpeve-Santu samu na kutwadisa Dibuundu; kaka mulongi ve, dibuundu nyonso! . . . kaka mulongi ke vwanda santu, ya kele, Dibuundu nyonso kele na Mpeve-Santu.

<sup>149</sup> Mpe na kisika ya Yawu, na kisika ya kuzwa Mpeve samu na kusala yawu, bawu me baka mwa galette mpe bisikiti, mpe mwa vinu, mpe kubokila yawu “*Kominyo* ya santu yina zola kutuba ‘Mpeve-Santu.’” Wapi mutindu na yinza bisikiti mpe ndambu ya vinu lendaka vwanda mpeve? Ntangu yayi, kana—kana yina kele mutindu, beno fwana tanga Actes 2 mutindu yayi: “Ntangu kilumbu ya Pantekote kusalamaka, awa kwizaka nganga-Nzambi ya Rome na nzila, mpe yandi tubaka ‘Beno basisa ludima’ mpe yandi tulaka galette, mpe yandi kunwaka vinu, yandi tubaka, ‘Ntangu yayi beno me kuzwa Mpeve-Santu.’” Ntangu yayi, awa beto banza ya kele ya boma. Ya kele.

<sup>150</sup> Ntangu yayi beto kulumuka; ba byekaka munu na dibuundu ya ba-Baptiste, beto baka beto ba-Baptiste. Uh-huh. Hmm? Ba-Méthodiste, yinki beto ke salaka? “Kana nge tuba ti ‘Yesu Klisto kele Mwana ya Nzambi,’ nge me vuuka.” Dyabulu ke kwikilaka ti Yandi kele Mwana ya Nzambi, mpe ke tekitaka na Yawu; kukondwa ntembe yandi ke kwikilaka yawu kulutilakusala na mingi ya bamambele ya dibuundu. Dyabulu ke kwikilaka kima mosi mpe ke tekitaka, samu ti yandi zaba ti yandi kele ya kubedisa.

<sup>151</sup> Ntangu yayi beto baka mutindu ya ba-Méthodiste, bawu—bawu ke tubaka ti, “Jean botikaka ve,” ti, “yandi mwangisaka mwa maza.” Ba ke tubaka, “Ya vwandaka na bampandi ya yisi ntoto mingi na kizunga, mpe—mpe maza vwanda lutaka na



bisika yina. Mpe yandi kuzwaka mpusu ya moule mpe salaka dibulu ya mpandi ya yisi ntoto.” Mpe bawu ntangu yayi ke longaka yawu. “Mpe yandi kuzwaka mwa maza na mpusu ya mpandi ya yisi ntoto yayi, to na mpusu ya moule yayi, na dibulu ya mpandi ya yisi ntoto yayi, mpe mwangisaka mwa maza na bantu.” Bulawu! Oh, mpangi!

<sup>152</sup> Mbote, awa beto ke baka yawu, “Ntangu kilumbu ya Pantekote kusalamaka, bawu nyonso vwandaka kisika mosi, na ntima mosi. Mpe pasteur kwizaka mpe longaka dilongi ya mbote, mpe tubaka, ‘Beno pesa munu diboko ya kusala kintwadi, mpe beto ke tula nkumbu ya beno na buku.’” Ya ke wakana kieleka ve, mutindu yina? Beno lenda kuzwa yawu. . . Beno lenda kuzwa yawu ve na almanach, ba zaba ya kulutila na yina. *Almanach ya Bilumbu ya Mbutukulu ya Bamama* ya ntama me lutila mingi na yawu.

<sup>153</sup> Mbote, yinki salaka yawu, kuna? Nicolaïte kotisaka nkonga ya bantu samu na kusala poto-poto na Masonuku, mpe kusala dénomination yina lenda ve kubika Nzambi kusala na kati ya yawu. Ya kufwaka kaka kuna! Kuna Yandi tubaka awa, “Nge kele ya kufwa! Nge kele na ‘nkumbu’ na yina nge ke na kuzingilaka, kasi nge kele ya kufwa!” Mingi ya bawu, ya kufwa, mpe zaba yawu ve.

<sup>154</sup> Munu mpe mpangi ya munu ya bakala vwanda loba, beto vwandaka bana ya fyoti ya babakala, na zulu awa. Mpe mu simbaka chélyde ya ntama, mpe mu zengaka yintu ya yandi; katulaka yandi na nsinga, mu vwanda zola ve kuvunama na kima yango; mpe losaka yandi na simu kuna. Mpe leki ya munu ya bakala kwizaka, mpe yandi tubaka, “Yinki nge vwandaka me simba mwa ntangu me luta?”

Mu tubaka, “Mfulututu.”

Yandi tubaka, “Yinki nge me sala na yandi?”

Mu tubaka, “Kuna, yandi kele ya kulala, *kuna*, mpe yintu ya yandi kele *kuna*.”

Mpe yandi kwendaka kuna. Mpe yandi tubaka, “Yandi kele ya kufwa?”

Mu tubaka, “Kieleka! Mu me kabula yintu ya yandi na nzutu ya yandi, yandi fwana vwanda ya kufwa.”

<sup>155</sup> Na yawu kuna yandi lokotaka yinti, mpe na kubanda na kuyinama na kulosa yintu ya mfulututu yayi na nzadi, mpe ntangu. . . to yinto. Mpe na yina yandi salaka, mfulututu yango simba yawu. Beno zaba, ba ke tatikaka dyaka ngunga mosi to zole. Yandi me dumuka me vutuka manima, yandi me tuba, “Hé! Mu banzaka ti nge tubaka ti, ‘Ya vwandaka ya kufwa.’”

Mu tubaka, “Yandi kele ya kufwa.”

Yandi tubaka, “Mbote, yandi zaba yawu ve. Ve.”

156 Na yawu ya kele mutindu bantu mingi kele: ya kufwa mpe zaba yawu ve! Ba-Nicolaïte! Oh, la la! Oh, Yandi tubaka, “Nge yina yawu.” Na kubakaka muvimba ya nyonso, banganga-Nzambi ya mbote ya santu, ba-cardinal ya santu, ba-bishop ya santu.

157 Mpe bayankaka ya beno ba-Pentecotiste, “Ti yandi kwiza, mukengi ya nene. Surveillant général, yandi ke tuba na beno kana beno lenda kuzwa lukutakanu ya kubeluka awa to ve. Ha, ha.” Aleluya! Mpeve-Santu kele yina ke tuba yawu to ve, Ndinga ya Nzambi ya Seko.

158 “Mbote, Mpangi Branham, beto ke kwikila ti Biblia ke longa ‘mbotika na Nkumbu ya Yesu,’ kasi surveillant général me tuba kana beto banda yawu na dibuundu ya beto, yandi ke losa beto nyonso na ngaanda.” Beno kwenda na ntwala. Ya kele kieleka. Mu ke zola mingi ba losa munu na ngaanda awa ti ba losa munu na ngaanda Kuna. Na yawu, kana beno katula kima *awa*, ba ke losa beno na ngaanda Kuna, na mutindu nyonso, na yawu ya kele mbote ti ba losa beno na ngaanda awa. Kana yandi losa beno na ngaanda awa, ba ke kotisa beno Kuna. Na yawu ya kele kaka kima mosi, na yawu beno vwanda kaka na Yawu.

159 Beto zola kuvwanda ya kulunga. Oh, la la, ya kele dyambu ya mfunu, mpangi. Beto fwana sungika kima yayi. Beto ke vwanda ata fyoti ve na kiyeka ya kuzwa Dibundu tii ntangu Nzambi ke kuzwa lufulu ya kutula Yawu. Ata mbala mosi ve ti Yandi ke tunga Dibundu ya Yandi na zulu ya kikunku ya bulawu. Yandi fwana kwiza landila Ndinga ya Yandi to Yandi ke kwiza ata fyoti ve; kaka landila Ndinga ya Yandi.

160 Muntu mosi, ntama mingi ve, na zulu kuna, tubaka, “Mpangi Branham, kwiza na Chatauqua.” Bantu yikwa vwandaka na Chatauqua? Oh, beno tala kaka awa, mosi na zulu ya tatu ya dibuundu to kulutila vwandaka na Chatauqua. Yina . . . Ntangu yayi, muntu yango telamaka kuna na manima ya midi yina, mpe beno nyonso kuwaka yandi, na kuzabaka ve ti mu ke zaba na zulu ya yawu. Nzambi lenda monikisa na kivinga na zulu kuna yina bawu ke tuba na yisi kuna, mpe, beno zaba, Yandi salaka yawu. Yandi telamaka kuna, tubaka, “Ntangu yayi, Mpangi Branham, oh, yandi kele kisadi ya Mfumu. Ntangu Mpeve kele na zulu ya yandi, yandi kele profete ya kupakula, kieleka yandi zaba, Nzambi ke tubaka na yandi yinki kele mpe yina ke vwanda; kasi théologie ya yandi, beno kuwa yawu ve.”

161 Wapi mutindu ya dibanza ya kubaluka! Wapi mutindu muntu lenda tuba yawu! Mbote, mu salaka ve. . . Mbote, kana beno zaba ve kuswasikisa wandu na bambuma ya kafe, beno ke—beno ke zaba ya kulutila yawu. Wapi mutindu beno lenda banza kima mutindu yina? Samu na yinki? Mbote, mpova kaka *profete* yawu mosi zola kutuba “mumoni ya Kinzambi ya Ndinga.” Wapi mutindu beno lenda . . .? “Ndinga ya Mfumu ke kwizaka na

profete.” Ata mbala mosi ve ti mu me tubaka ti mu kele mosi, ba ke tubaka yawu. Kasi beno bawu yayi. Beno me mona?

<sup>162</sup> Wapi mutindu muntu, ke kangama na malongi mosi ya fyoti ya dibuundu na kisika mosi, samu ti organisation ya bawu ke ndima Yawu ve, Na kutekisaka bukuluntu ya beno samu na ndonga ya supu, Esaü, nge muntu ya luvunu ya mpasi! Ya kele kieleka. Beno ke tekisa bukuluntu ya beno samu na ndonga ya supu, samu na ndonga ya dénomination, ndonga ya organisation yina Nzambi ke yinaka. Beno bambuka kaka moyo, beno ke tubaka “organisation,” Nzambi ke yinaka yawu! Ya kele kima yina ke kabulaka bampangi, mpe zengaka . . . Ya kele na mingi ya ba-Méthodiste, ba-Baptiste, mpe ba-Presbytérien, na nkokila yayi, ke zola kubundana na mesa ya Nzambi. Kasi kana bawu sala, ba ke losaka kaka bawu na ngaanda ntangu kaka bawu ke banda na kukota na yawu. Ya kele kaka kieleka.

<sup>163</sup> “Mama vwandaka muntu ya yawu,” mpe bawu kele kaka mintekolo na kubanda. Oh, la la! Mu ke kipe ve na yina mama vwanda muntu, mama zingaka na Nsemo nyonso yandi kuzwaka na kilumbu ya yandi, beno ke na kuzingaka na kilumbu yankaka.

<sup>164</sup> Science mbala mosi monisaka, pene ya bamvula bankama tatu me luta, na kubaluka balle na globe, ba tubaka, “Kana ditoma mosi kwenda mbangu makumi tatu ya bakilometele na ngunga mosi, ngolo ya kubenda ke nangula yawu katuka ntoto mpe kunata yawu na zulu.” Beno banza ti science bubu yayi ke kwikila yawu? Bawu ke tambula bakilometele bankama kumi na yivwa na ngunga mosi. Bawu ke tala manima ve samu na kumona yina bawu tubaka, bawu ke tala manima, na kumona yina bawu lenda mona na ntwala.

<sup>165</sup> Kasi dibuundu ntangu nyonso zola kutala na manima, beno mona yina Wesley tubaka, yina Moody tubaka, yina Sankey tubaka. “Nyonso lenda salama na bawu yina ke kwikila,” beto tala na ntwala! Kima kaka na Biblia yina ke talaka manima . . . Beno zaba mutindu ya niama yina ke talaka ntangu nyonso na manima? Ya kele luzingu ya kulutula yisi. Bantu yikwa zaba luzingu ya kulutila yisi yina kele yina ke tambulaka? Mpangu. Mpangu kele luzingu ya kulutila yisi yina kele, mpe muntu kele luzingu ya kulutila zulu yina kele. Mpe mpangu ke talaka manima. Mu ke zolaka ve luzingu yango ya yisi ya ntama. Mu zola kutala na ntwala, kukwikila, kusala kivuvu, kutambula na Nsemo mutindu Yandi kele na kati ya Nsemo, na yina Yandi ke lezima Nsemo.

<sup>166</sup> Kilumbu mosi na Kentucky mu vwanda kuzwa lukutakanu, kiboba mosi me kwiza, mpe yandi tubaka, “Oh, mu ke kwikilaka ve na kubeluka yina.”

Mpe mu tubaka, “Mbote, ya kele mbote mingi, nge kele muntu ya Amerika.”

Yandi tubaka, “Mu—mu ke kwikilaka ve kima kana ti mu mona yawu ve.”

Mpe mu tubaka, “Mbote, ya kele mbote mingi.”

Yandi tubaka, “Ntangu yayi, mu ke na dyambu ve na nge, kasi mu—mu ke kwikila ve yina nge ke tubaka.”

Mu tubaka, “Ya kele bweso ya beno mosi muntu ya Amerika, beno fwana ve.”

Yandi tubaka, “Ntangu yayi, mu ke ndimaka ve kima kana ti mu mona yawu pwelele.” Hmm!

Mu tubaka, “Mbote, ntangu yayi mu... ya kele—ya kele mbote, nge fwana vwanda muntu ya Missouri.”

Yandi tubaka, “Ve, mu kele muntu ya Kentucky.” Fiu!

“Ya ke wakana mbote mingi ve samu na Kentucky,” mu tubaka. “Kasi, na mutindu nyonso,” mu tubaka, “kana nge... ya kele mutindu beno ke banza, beno kwenda na ntwala.” Mpe yandi tubaka—yandi tubaka... Mu tubaka, “Wapi mutindu nge ke kwenda na yinzo?”

<sup>167</sup> Yandi tubaka, “Mu ke sabuka mongo. Mu ke vwandaka na lweka yankaka... Mbote, kwiza na munu.” Muntu ya mbote. Yandi tubaka, “Kwenda na yinzo na munu, vwanda mpimpa nyonso, Mpangi Branham.”

Mu tubaka, “Kana mu lendaka, mpangi ya bakala.” Kasi, mu tubaka, “Mu ke mata awa na mama-nkazi ya munu.” Mpe yandi tubaka... Mu tubaka, “Nge ke zola kukwenda na ditoma?”

Yandi tubaka, “Ve, mu fwana mata na kusabuka mongo kuna, na zulu na nzila yayi, mpe kukulumuka na dibulu mosi, mpe kumata,” nge zaba mutindu ya kele na yisi kuna.

Mpe mu tubaka, “Mbote,” mu tubaka, “wapi mutindu nge ke kuma kuna?”

Yandi tubaka, “Mu ke mata nzila kuna.”

“Mbote,” mu tubaka, “nge lenda mona kaka ve diboko ya nge na ntwala ya nge.” Mu tubaka, “Wapi mutindu nge ke mata kuna?”

Yandi tubaka, “Mu kele na mwinda!”

Mpe mu tubaka, “Mbote, wapi mutindu nge... Yinki nge ke sala, kunamisa mwinda yango mpe kuna kutambula na yawu?”

Yandi tubaka, “Yinga, tata.”

Mu tubaka, “Ntangu nge ke namisa mwinda yango, nge lenda simba yawu na zulu mutindu yayi? Mu ke zola kumona yinzo ya nge.”

Yandi tubaka, “Nge lenda mona yawu ve.”

Mu tubaka, “Na yina wapi mutindu nge ke kuma kuna?”

“Oh,” yandi tubaka, “Mu ke namisa kaka mwinda; mpe na yina mu ke tambula, ya . . . mu ke tambula kaka na kulandaka nsemo . . .”

Mu tubaka, “Ya kele kaka yawu. Amen, tambula kaka na Nsemo.”

<sup>168</sup> Beno landila kaka na kutambula! Beno telama ve, beno ke kuma kisika ve. Kana beno me kuzwa mpululu, beno tambula na kusantisama. Beno ke tuba, “Wapi mutindu beno ke kuma kuna?” Beno landila kaka na kutambula. “Mbotika ya Mpeve-Santu kele na manima ya kusantisama? Wapi mutindu mu ke kuzwa yawu?” Landila kaka na kutambula na kati ya Nsemo. “Bidimbu, mambu ya ngitukulu, mpe bimangu . . .?” Beno landila kaka na kutambula na kati ya Nsemo. Beno me mona? Beno landila kaka! Konso ntangu beno ke sala dikulu, Nsemo ke dumuka kaka fyoti na ntwala ya beno. Yandi kele ntangu nyonso na ntwala ya beno. Yandi ke pusaka ve, Yandi ke twadisaka. Yandi kele Nsemo. Oh, mu kele na kyese mingi samu na yawu. Beno ve? Yandi kele Nsemo, na kati ya Yandi ya kele na ata mudidi ve.

<sup>169</sup> “Nge ke yinaka bisalu ya Nicolaïte.” Yina kumaka malongi. Ntangu yayi beto mona yina Paul . . . Ntangu yayi, nani dibuundu . . . Nani salaka dibuundu yayi ntangu yayi? Paul, Ephèse.

<sup>170</sup> Beto luta ntangu yayi na Actes kapu ya 20, kaka minuti mosi. Na Actes kapu ya 20, mpe kumona yina Paul . . . Beno ke kwikila ti Paul vwandaka profete? Kieleka, yandi vwandaka. Kieleka, yandi vwandaka. Beno ke bambuka moyo na vision ya mpimpa yina na zulu ya mupepe ya ngolo na mubu, mpe nyonso yina? Ntangu yayi, . . . mpe nyonso ya yawu. Ntangu yayi kapu ya 20 ya Santu . . . ya Exo- . . . Actes, mpe beto banda ntangu yayi na nzila ya 27, mpe beno kuwa mbote ntangu yayi na yina beto ke tanga. Ntangu yayi, yayi kele Paul, profete, yina ke na kutubaka na ntwala yina ke salama.

*Samu ti mu me kima ve na kuzabisa na beno muvimba ya malongi ya Nzambi.*

<sup>171</sup> Muntu yango ya kusakumuna! Oh, mu zola kutelama kuna kilumbu yango mpe kutala mbote ba kutula yimpu na zulu ya yintu ya yandi martyr yango. Kana ya kele na kima mutindu mu lenda kudila, kuna mu ke dila. Mu ke boka, na kumona Paul.

Kumona Santu Paul, ntumwa yango ya nene,  
Na robe ya yandi ya kitoko mpe ya kulezima;  
Mpe mu ke kwikila ti ya ke vwanda na mwa  
kuboka  
Ntangu beto nyonso ke kuma kuna. (Beno ve?)

<sup>172</sup> Ntangu yayi:

*. . . mu me kima ve na kuzabisa na beno muvimba ya malongi ya Nzambi.*

173 Ya kele kieleka? Ntangu yayi, Miklisto, beno tala mutindu yayi; mu zola kuyufula beno kima mosi. Nani ya vwandaka yina tumisaka bantu yina botamaka mutindu yankaka na ngaanda ya Nkumbu ya Yesu Klisto na kwiza mpe kubotama dyaka? [Dibuundu me tuba, "Paul."—Mu.] Yandi longaka malongi nyonso. Ya kele kieleka? Oh? Mpe yinki Paul tubaka na . . . mu banza ya vwandaka na . . . Mu ke kwikila ve ntangu yayi kana ya kele na Thessaloniciens kapu ya Ntete mpe nzila ya 8. "Kana beto to wanzio mosi kukatuka Mazulu kulonga nsangu mosi ya mbote yankaka, kana wanzio kulumuka na Mazulu mpe longa nsangu mosi yankaka na yayi" (ti kutumaka bantu na kuzwa dyaka mbotika na Nkumbu ya Yesu Klisto, mpe Nsangu ya mbote yina Paul longaka) . . . "Kana wanzio mosi katuka Mazulu" (ve . . . beno bika swi bishop, to cardinal, to surveillant général, to pasteur, to—to kima mosi) . . . "Kana wanzio kulumuka na Mazulu mpe longa nsangu ya mbote yankaka na ngaanda ya yayi, ti yandi vwanda ya kusingama." Ya kele kieleka. Ya kele kieleka? Yinki yandi tubaka, ya kele Galates 1:8. Mu me banza kaka na yawu. Mbote mingi, Galates 1:8, kana beno zola kusonika yawu, beno mona yina Paul tubaka.

174 Ntangu yayi, awa yandi ke tuba . . . Ntangu yayi 27, mu banza nzila ya 27:

*Samu ti mu me kima mosi ve na kuzabisa na beno . . . muvimba ya malongi ya Nzambi.*

175 Ntangu yayi beno kuwa yina yayi . . . Yayi kele profes:

*Beno keba mbote kuna na beno mosi, mpe na mameme nyonso, na zulu . . . yina Mpeve-Santu . . . tulaka beno mikengi, samu na kudikisa dibuundu ya Nzambi, yina yandi me futa na menga ya yandi mosi.*

176 Nani futaka? Menga ya nani ya vwandaka? Biblia ke tuba ti ya vwandaka Menga ya Nzambi. Nzambi, na Menga ya Yandi mosi. Ya kele kieleka?

*. . . na kudikisa dibuundu ya Nzambi, yina yandi me futa na menga ya yandi mosi.*

177 Biblia ke tuba ti beto kele ya kuvuuka na nzila ya Menga ya Nzambi. Beno zaba yawu? Kieleka, Yawu ke salaka. Mbote mingi:

*. . . futa na menga ya yandi mosi.*

*Samu ti mu zaba yayi, ti na manima ya kukwenda ya munu bayingo ya yimbi ke kota na kati-kati ya beno, ke bika ve na lweka mameme.*

*Mpe samu na beno mosi . . . (Beno tala mbote, muntu yango kulenda kutala ntama mpe kumona kima yango kukwiza.) . . . na beno mosi bantu ke telama, na*

*kuzonzaka bima ya boma, samu na kubenda bilandi na manima ya bawu.*

178 [Kisika ya mpamba na bande—Mu.] Bamvula na ntuala na yina yandi. . . To nkonga ya bantu yina zola kusala organisation mpe kukatula busantu mpe Mpeve-Santu na dibuundu, mpe kutula yawu na zulu ya ba-bishop mpe ba-pape mpe banganga-Nzambi, na . . . bawu ke vwanda ya santu, mpe dibuundu ke zinga mutindu nyonso bawu—mutindu bawu ke zola. Mpe bawu ke futa banganga-Nzambi mpe yandi ke sambila samu na bawu na kubasika na difelo, mpe nyonso ya mutindu yina. Mpe ya kele Nicolaïte! Mpe Nzambi tubaka, “Mu yina yawu!” Ntangu yayi beno kuwa.

“Ti beto mona, mpe nge kutuba, ‘Nzambi tubaka ti Yandi yinaka yawu?’”

179 Ntangu yayi beto mona kana Yandi tubaka:

*Kasi yayi kele na nge, ti nge yina bisalu ya ba-Nicolaïte, yina mpe mu ke yinaka.*

180 Nzambi ke yinaka organisation. Ya kele kieleka? Ntangu yayi beno ke mona kieleka yina ba zolaka sala, beno me mona yina bawu salaka. Ntangu yayi beno tala mbote na dibuundu kana bawu ke sala yawu ve. Yandi ke yinaka organisation!

*Yandi yina kele na makutu, ti yandi kuwa yina Mpeve me tuba na mabuundu; . . .*

181 Ntangu yayi, *bayingo* ya Paul me kuma “Nicolaïte.” Ba vwanda meka na kusala kinganga-Nzambi mutindu kinganga-Nzambi ya Levi, yina vwandaka ya nzenza na malongi ya Ngwisani ya Malu-malu. Amen! Mpova *Nicko*, mpova *Nicko* na Grec zola kutuba “kununga, kubebisa.” Kubebisa yinki? Misambidi, Mpeve-Santu. Kubasisa na dibuundu Mfumu Yesu yina vumbukaka na bidimbu mpe mambu ya ngitukulu na katikati ya mikwikidi, mpe kutula muntu yina bantu me vote na kuvwanda pape, to na ya nsuni. . . na cardinal, to mukengi na kumeka kukatula Mpeve-Santu na misambidi mpe kupesa yawu na kalasi ba ke bokila kalasi ya bantu ya santu, na kutulaka bawu na zulu ya misambidi; ve samu na kubokila bawu *ba-pasteur* yina zola kutuba “mivungi,” kasi *tata*; yina Yesu tubaka, “Beno bokila ata muntu ve ‘tata’ na zulu ya ntoto.” Beno me mona kima yango ya yimbi? Mpe yinki beto salaka?

182 Oh, kana beto lendaka telama. Mu zola zola ve ti beto kuzwa bankokila nyonso yayi ya kukanga mutindu yayi, mu ke zola kubaka nkokila ya mbasi kapu ya 12 ya Apocalypse mpe kutalisa beno ndumba ya kento ya ntama yina ya kuvwanda na zulu kuna, ndumba. Mpe kento. . . ya kele samu na yina yandi vwandaka, samu ti yandi salaka kindumba. . . na Nzambi, mpe bokilaka yandi mosi mufwidi ya kento, mpe dyaka yandi vwandaka mama ya bakento ya kindumba. Ya kele kieleka? Ntangu yayi, beto zaba ya vwandaka Rome, samu ti yandi vwandaka ya kuvwanda

na zulu ya myongo sambwadi, mpe nyonso kaka kieleka, muntu kele na kati ya yandi mpe ke na lutangu ya niama, mpe nyonso yina. Beto nyono zaba yawu landila malongi ya ntama, nani ya vwandaka. Kasi kima ya mawa na yawu, yandi vwandaka mama ya bakento ya kindumba. Yayi kele mbandukulu ya muswa ya yandi awa, na kuvwandaka na Rome mutindu nkonga ya Miklisto, yina ba ke bokila Miklisto.

<sup>183</sup> Beno kuwa! Nzambi sadisa munu na kukumisa yawu pwelele! Nkonga ya Miklisto na dibuundu mutindu yayi. Ba kumaka bantu ya misiku, mpe ya mutindu yankaka, mpe kabukaka, mpe me sala bawu mosi organisation. Mpe kuna vukisaka yawu, na Nsungu ya Mudidi, na luyalu. Mpe luyalu mpe dibuundu kumaka mosi yinki? Dibundu ya Miklisto, “dibuundu ya Katolika ya Santu” ba bokilaka yawu, (Mpova *Katolika* kele, mpova zola kutuba, “ya bantu nyonso”), “dibuundu ya nene ya Miklisto ya bantu nyonso.” Mpe bokilaka bantu yina vwandaka zonza na bandinga, mpe vwandaka boka, mpe vwandaka belusa bambevo, mpe nyonso yankaka, “ba-eretiki.” Mpe na nsuka ba salaka yawu ya kukwika ti muntu nyonso yina ba zolaka simba vwandaka sambila mutindu yina, ba zolaka losa yandi na dibulu ya bankosi, kana ba zolaka ndima ve mutindu Katolika. Ya landilaka bamvula nyonso yayi ya bankama ya kotalisa mpasi yango kuna. Kasi Dibundu yango kufwaka ve. Beno lenda kufwa Yawu ve. Nzambi tubaka ti Yawu ke zinga tii nsuka mpe na manima Yandi ke pesa Yawu yimpu ya Luzingu. Ya me landila nzila ya bansungi yango ya lukwamusu.

<sup>184</sup> Na manima kwizaka Martin Luther samu na kulandila na nsungi mpe lutisaka dibuundu na lunungu. Yinki salamaka ntangu Luther kufwaka? Ba bongisaka yawu, ba salaka yawu dibuundu ya ba-Luhtérien; ba kele na malongi. Ntangu ba bongisaka yawu, yinki ba salaka? Ba vutulaka yawu mbala mosi dyaka na kati ya mutindu ya Rome. Kaka kieleka.

<sup>185</sup> Na manima Mpeve-Santu basikaka na yawu mpe Wesley monaka Yawu. Mpe Wesley, mpe Whitfield, mpe George Whitfird, mpe mingi ya bayankaka yango, mpe—mpe Asbury, mpe mingi ya bawu vwandaka bantu ya réveil ya nene. Ba vuukisaka yinza na kilumbu yina. Ba vwandaka na réveil na Nsungu yango ya Philadelphie yina vuukisaka Angleterre, mpe États-Unis mpe. Ba losaka bawu na ngaanda na bisika ba vwandaka kuzwa ya balukutakanu mpe ba bokilaka bawu “ba-exalté.” Beno ba-Méthodiste, beno kuzwa yawu; ba vwanda kubwa na ntoto na yisi ya ngolo ya Nzambi, mpe ba vwanda losa bawu maza na bizizi ya bawu mpe vwandaka sala bawu mupepe. Ya kele kieleka. Mpe bawu sepelaka mingi na yisi ya yawu, ti bawu kuzwaka. . . tii bawu tubaka ti “bawu kuzwa bakutekita.” Ya vwandaka na bantu zolaka tekita mpe kuningana na yisi ya ngolo ya Mpeve-Santu. Yina kele disolo ya ba-Méthodiste.



Katuka kuna me kwiza ba-Quaker mpe nyonso yina; ti ntangu yayi ba me bongisa yawu.

<sup>186</sup> Ba salaka nkonga ya ba-Méthodiste *yayi*, ba-Méthodiste ya Ntete, mpe nkonga *yayi* ya ba-Méthodiste, mpe nkonga *yina* ya ba-Méthodiste, tii ya kulumukaka yisi mingi ti bantu ya ba-Méthodiste zola kukatula “Menga” na babuku ya bawu ya bankunga.

<sup>187</sup> Awa nkokila yankaka yina, na yina me tala manaka na televizyo (Mama ya munu kubokilaka munu.) ba vwandaka na pasteur ya Méthodiste, kaka awa na Indiana, yina vwandaka long rock-and-roll na kati ya dibuundu. Yandi tubaka, “Ya kele mawa ti beto kondwaka na kumona art ya kitoko yayi yina ke kota na dibuundu.”

<sup>188</sup> Ya kele dyabulu na kati ya profete ya luvunu! Kieleka! Mu zola ve kunyongisa beno kasi, mpangi, ya kele Kieleka ya Nzambi. Mu ke zola mingi kudasukila beno mwa fyoti mutindu yayi mpe kusala beno kulongoka Masonuku, ya lendaka vwanda kusungama na Nzambi, kana ti kuzimbana na nsuka. Beno lendaka zola munu ve ntangu yayi, kasi kilumbu beno ke bumba munu, na kutubaka, “Mpangi Branham, ya kele Kieleka.” Awa ya kele kaka awa, mpe ba ke na kukotaka na yawu. Ya kele kisika bawu . . . Ya kele kaka kuna. Biblia ke tuba ba ke sala yawu.

<sup>189</sup> Na manima ya Wesley, kana Wesley salaka yawu, kuna me kwiza bantu ya Pantekote. Mpe bawu kuzwaka kuvutula ya makabu, bandaka na kuzonza na bandinga, mbotika ya Mpeve-Santu.

<sup>190</sup> Kaka mutindu mbuma ya disangu ke basikaka na ntoto. Kima ya ntete, ya ke pola. Ya ke basisa mwa matiti. Na manima ya yawu . . . Beno ke kuzwa bilanga ya masangu, beno ke banza. Matiti yina ke kula mpe ke sala fololo. Ya ntete yayi, vwandaka ba-Luthérien. Fololo, yinki ya vwandaka? ba-Méthodiste; pollen, luzolo ya bampangi, kusamuna, pollen ke tsyamuka na bayankaka.

<sup>191</sup> Mbote, mpe yinza ke tuba na bansungi yayi ya dibuundu. Ba-Méthodiste me basika na poto-poto . . . to, mu zolaka tuba, ba-Luthérien basikaka na poto-poto. Ba-Méthodiste me ningisa luzolo ya bawu ya bampangi, mpe kilumbu ya kusamuna, mpe—mpe kilumbu ya—ya ki-missionaire. Ki-missionaire ya kilumbu ya kulutula nene yina yinza me zaba vwandaka na ntangu ya ba-Méthodiste. Ya kele kieleka. Ba tsyamunaka pollen ya bawu.

<sup>192</sup> Yinki basikaka kuna? Na ngaanda ya pollen yina basikaka yinti ya disangu, ba-Pentecotiste. Mbuma, kaka mutindu mosi ya kima yina ba kundaka. Dikasa ve, fololo ve, kasi mbuma. Mpe ntangu yayi ba-Pentecotiste me fulusa mbungi yango nyonso na mbuma, tii yawu . . . na mpasi beno lenda mona mbuma. Ya me kuma ntangu ya kusukula yawu! Amen! Yinki bawu salaka? Bawu salaka kima mutindu mosi na yina salaka ba-Méthodiste.

Muntu mosi bongisaka bawu na nkonga, tubaka, “Beto keke ba-Assemblée de Dieu.” Mosi yankaka, “Beto keke ba-Pentecotiste ya Sainteté.” Mosi yankaka, “Beto keke ba-Unitaire.” “Beto keke ba-Binitaire.” Mpe—mpe ya keke na mingi mingi ya yayi, mpe mingi mingi ya yawu. Oh! Na kutambulaka na samo ya nkunki mosi, ya bankunki zole, ya bankunki tatu, nyonso. Oh, ya keke na makumi sambanu, to makumi tatu, to makumi yiya ya ba-organisation ya bawu.

<sup>193</sup> Yinki ba salaka? Ba losaka kaka dyaka yawu na mutindu ya Rome, kubotika na mbotika ya Dibuundu ya Katolika ya Rome. Mu ke lomba na Pentecotiste nyonso na kotalisa munu kisika muntu mosi na Biblia kubotamaka na nkumbu ya “Tata, Mwana, mpe Mpeve-Santu.” Mu ke lomba na bishop nyonso, na cardinal, na mulongisi nyonso, na kotalisa munu kisika ya vwandaka ntete, ba salaka ntete na ngaanda ya dibuundu ya Katolika. Mpe Luther nataka yawu na yandi, yandi nataka katekisima mpe nyonso yankaka na ngaanda ya yawu. Ba-Méthodiste landilaka na yawu. Ba-Pentecotiste, beno fwana vwanda na nsoni! Beno vedisama! Beno vutuka na Ndinga! Beno balula ntima to Nzambi ke katula mwinda na beno, Nsemo yina keke na beno. Amen! Mbote mingi.

<sup>194</sup> Bawu me katula Mpeve-Santu mutindu Ntwadisi, mpe me pesa bawu kalasi ya bantu ya santu, mpe me tula bawu na zulu ya misambidi. Mpe ke bokila bawu ve “ba-pasteur, mivungi,” (Beto fwana vwanda ya kubokila *ba-pasteur*, “mivungi,” yina zola kutuba mpova *pasteur*.) kasi “tata, cardinal, archevêque, to surveillant général.” Bantu ya kieleka yinaka kima yayi! Mpe Nzambi ndimaka yawu samu na bawu, mpe tubaka, “Mu yina yawu, mpe!” Samu ti Yandi zolaka vwanda surveillant général, archevêque, mpe pape. Yandi ke salaka na muntu mosi; ve na organisation, kasi na muntu mosi.

<sup>195</sup> Ntangu yayi, na mutindu ya ngitukulu. . . Beno kuwa, na yina beto ke na kwendaka na kusukisa. Beto keke kaka na nzila mosi dyaka.

<sup>196</sup> Awa beto keke na dogme ya mbandukulu ya mutindu ya Katolika, bilandi ya bantumwa. Bantu yikwa zaba yawu? Mutindu ya bantumwa. Ntangu yayi Katolika ke tuba ti “Pape bubu yayi keke mulandi ya Pierre, bilandi ya bantumwa.” Ya keke ve na kima mutindu. Wapi mutindu na nsatu ya beno ya nsuni, ya kuvukisa banzutu. . . Wapi mutindu ya vwandaka ti Esai mpe Jacob vwandaka ya kubutama bawu zole na tata ya santu mpe na mama ya santu, mpe mosi ya bawu Muklisto mpe mosi yankaka dyabulu? Uh-hum. Wapi mutindu ya lenda vwanda? Samu ti disumu keke disumu, mpe kuvukisa banzutu keke kuvukisa banzutu, kasi Nzambi ke pesaka Mbutukulu.

<sup>197</sup> Nzambi soolaka beto kubanda mbutukulu ya yinza. Beno zaba yawu? Beno vingila tii ntangu beto ke kota na kutanga

bantu ya masolo yayi, mpe kutala mbote mutindu Irénée... mutindu yandi pesaka Nzambi nkembo na kusoalaka yandi ntete mbandukulu ya yinza; mutindu ti Santu Martin mpe bawu nyonso, pesaka Yandi lukumu; Nzambi, lukumu. Na kutubaka, “Samu ti...” Mpe bantu vwandaka zonzila na yandi, na kutubaka, “Yandi soolamaka ntete mbandukulu ya yinza.” Ya kele Masonuku. Bampangi yango vwandaka ya kusungika na Nzambi. Kasi dibuundu ya ntama ya mpimpa yayi sabukaka funda na bankama tanu ya bamvula ya Bansungi ya Mudidi yayi, kangaka kima ya muvimba mutindu mwinda ke pesa mulinga, na kuzimbisaka Bansemo. “Kasi ya ke vwanda na Nsemo na ntangu ya mpimpa,” Mfumu tubaka.

<sup>198</sup> Bilandi ya bantumwa, mosi na manima ya mosi yankaka; paapa mosi, mpe beno fwana vwanda na nzila ya ba-pape ntete beno vwanda pape. Oh, la la, oh! Ya kele bulawu. Misambidi... Muntu ya santu mpe muntu ya kudedama ve, kasi...ti...ti—ti banganga-Nzambi kusambila samu na bawu mpe kubasisa bawu na masumu ya bawu, kulemvokila masumu ya bawu, kufuta mbongo samu na mfunguna.

<sup>199</sup> Ba-Protestant ke salaka mutindu mosi! Bawu ke mekaka na kuvwanda... ke bula mwa mbata na manima ya pasteur ya bawu mpe kuzinga mutindu bayankaka na yinza. Mpe yandi zaba mingi ve na Nzambi kulutila yina yandi ke salaka...yandi ke bika bawu kuvwanda na dibuundu ya yandi mpe ke bokila bawu bamambele ya dibuundu ya yandi, mpe ke bika bawu na kati kuna mpe ke tuba na bawu ti ba kele ya kuvuuka. Wapi mutindu bawu ke nyonga na kilumbu yina kana bawu kele ve ya kubutama dyaka! Kukondwa Mpeve-Santu beno kele ya kuzimbana. Muntu ve lenda tuba, “Yesu kele Klisto,” kaka na nzila ya Mpeve-Santu.

<sup>200</sup> Dibuundu ya kieleka na Ephèse kuvunamaka ve na bakuzonza ya sema, ya mayela yayi. Yandi... Ba yinaka yawu. Ba vunamaka ve, ba zaba; Dibuundu ya kieleka vwandaka ve.

<sup>201</sup> Luzayikisu ya luvunu ti bantu yayi kuzwaka, na kubokilaka ba-Nicolaïte, yina vwandaka wisana ve na Ndinga ya Nzambi. Beno tuba na munu kisika beno me monaka ntete “nganga-Nzambi na mfunguna” ya kutuba na Biblia awa. Wapi kisika beno me monaka ntete “kumwangisa ya mwa maza” ya kutuba na Biblia awa samu na lemvo ya disumu? Wapi kisika beno me monaka ntete muntu kubotama na nkumbu ya “Tata, Mwana, mpe Mpeve-Santu” samu na lemvo ya disumu ya beno? Wapi kisika beno me monaka ntete yayi, “Kupesa diboko ya kusala kintwadi, mpe kutula nkumbu ya bawu na buku ya dibuundu” na kati kuna? Wapi kisika beno me monaka ntete bima nyonso yayi? Yinki ya kele? Ya kele kinganga-Nzambi to kisyelo ya kele ve ya kulunga na Ndinga, mpe ba kele ba-Nicolaïte, mpe Nzambi tubaka, “Mu yina yawu!” Beno vutuka na Ndinga. Oh,

ya kele . . . Mu zaba ti ya kele ngolo, bankundi, kasi mu—mu—mu kele mfumu ve; na Yesu, beno dasuka na Yandi.

202 Luzayikisu ya luvunu, na Ndinga ve, kasi, bokilaka bawu “bantu ya luvunu, bantumwa ya luvunu, baprofete ya luvunu.” Kasi Dibuundu ya kieleka kangamaka na malongi ya ntete ya Santu Paul mpe mbotika ya Mpeve-Santu, na bidimbu vwandaka landa mpe vwandaka siamisa Ndinga yina Paul tubaka. Amen! Beno talisa munu kisika Nzambi zolaka siamisa nsangu ya mwa kumwangisa maza. Beno talisa munu kisika Nzambi zolaka siamisa ntete, mpe kunata kuzonza na bandinga mpe bima ya nene, kaka na nzila ya kupesana maboko na pasteur kisika mosi mpe kutula nkumbu ya beno na buku; mpe kulandila na kutafuna, kunwa tabaka, kunwa, kuvuna, kubula bakalati, kusakana fyoti, kukwenda . . . Oh, kyadi! Ya kele nsuni, profete ya luvunu, nkundi. Yinga, tata.

203 Mutindu ya Nzambi kele busantu. Ti yayi kuzabana na mambele nyonso awa ya Nzutu ya Klisto: tii beno ke zinga luzingu ya santu, Nzambi ke manga munkayulu ya beno. Munkayulu fwana pesama na maboko ya santu. Ya kele . . .? . . . kieleka. Nganga-Nzambi ya ntete ntete yandi kota samu na kupesa munkayulu, yandi fwana vwanda ya santu, mpe ya kubiyadisa, mpe ya kupakula, mpe ya kutula mananasi, mpe nyonso, ntete yandi kota na mvwandulu ya Nzambi na kupesa munkayulu. Ya kele kieleka? Na yina wapi mutindu beno lenda basika awa mpe kuvuna, mpe kuyiba, mpe kudasuka, mpe kunwana na bamfinangani ya beno, mpe nyonso yankaka, mpe kulandila mutindu beno ke salaka, mpe kuna kukwiza mpe kutuba, “O Mfumu Nzambi! Nkembo na Yesu! Alleluia!”

204 Bantu ke tubaka, “Mu ke mona bawu kuzonza na bandinga.” Yina dyaka ke zola kutuba ve ti bawu kele na Mpeve-Santu. “Mu ke kuwa bawu kulooka.” Yina dyaka ke zola kutuba ve ti bawu kele na Mpeve-Santu. Mpeve-Santu kele luzingu.

205 Biblia ke tuba, “Mvula ke kubwaka bambala mingi na zulu ya ntoto, samu na kukubika yawu, samu na kusala yawu na yina ba me kubika yawu,” (Hébreux 6) “kasi matiti ya bansende mpe bansolokoto yina kele pene ba losa, nsuka ya yawu kele kunyenga.”

206 “Mwini ke lezimaka na zulu ya bantu ya kudedama mpe bantu ya kudedama ve. Mvula ke kubwaka na zulu ya bantu ya kudedama mpe bantu ya kudedama ve.” Mvula ke kwizaka samu na kusala blé kukula (mutindu beto ke bokilaka yawu), mpe konso dititi ya yimbi yina kele na bilanga. Kana blé kele na mpwila, kuna dititi kele na mpwila. Mpe mvula mosi yina ke pesa maza na blé, ke pesa maza—ke pesa maza na matiti ya yimbi mpe. Mwa blé yango ya ntama ke telemisa yintu ya yandi mpe ke boka, “Nkembo na Mfumu! Alleluia! Alleluia! Mu kele na nsayi mingi na kuzwa mvula yayi!” Ke boka mwa dititi yango ya yimbi

ya ntama, “Nkembo na Nzambi! Lukumu na Nzambi! Alleluia! Mu kele na nsayi na kuzwa Yawu.”

207 “Kasi na nzila ya bambuma ya bawu beno ke zaba bawu.” Ya kele kieleka. “Na nzila ya bambuma ya bawu beno ke zaba bawu.”

208 Nzila ya 7, mpe kuna beto ke sukisa, yayi kele nsuka ya nsungi ya dibuundu. Ntangu yayi beto ke vwanda pene ya baminuti tanu na ngunga ya yimbi, to kumi, kaka minuti mosi.

*Yandi yina kele na makutu, ti yandi kuwa yina Mpeve ke tuba na mabuundu; Na yandi yina ke nunga Mu ke pesa ya kudya na yinti ya luzingu, yina kele na kati-kati ya paladiso ya Nzambi.*

209 Ntangu yayi beno tala, bankundi, awa kele mutindu beno ke nunga. Ya ntete beno fwana nunga, na manima beno lenda kudya mbuma. Ya kele kinungi. Beno ke bambuka moyo na nkokila yankaka yina, kulonga ya beto ya nkokila ya mazono? Jean zolaka kota na Kimpeve ntete yandi kumonaka kima mosi. Mpe wapi mutindu beno ke vwanda, ke tuba, “Kana yandi kele ve Baptiste, mu ke kuwa yandi ve?” “Kana yandi kele ve Presbytérien, mu ke kuwa yandi ve.” “Kana yandi longa kaka kieleka ve yina dibuundu ya munu ke longaka, mu . . .” Beno—beno—beno ke nunga ve, beno me kota ntete ve na Kimpeve. Beno kele ntete beno nyonso na ngaanda ya nzila.

210 Beno kota na Kimpeve, beno tuba, “Mfumu Yesu, mu zola Nge, ntangu yayi monikisa munu nyonso yina Nge ke mona kele ya kulunga, nata yawu kaka na kati ya munu.” Na manima beno ke—na manima beno ke kuzwa nyonso ya kulunga. Ya kele kieleka.

211 Beno tala, bambala tatu Biblia ke zonzila na—na Yinti ya Luzingu na Genèse, bambala tatu na Buku ya Apocalypse. Kilumbu yankaka yina beto talaka yawu. Beno ke bambuka moyo? Lumingu, mazono. Kaka . . . Dyabulu ke yinaka konso kitini ya Masonuku yina kele, kasi yandi ke yinaka, mingi, Genèse mpe Apocalypse. Yandi ke nwanisaka Genèse samu na kieleka ya yawu, samu ti yandi ke zola kusala bantu kukwikila ti Yawu vwandaka ve mutindu yina; “Na Genèse ya salamaka ve mutindu Nzambi tubaka ti ya salamaka, ya vwandaka na kima yankaka yina salaka ti ngidikulu yayi mpe nyonso kusalama.” Na yawu yandi ke nwanisaka Yawu mutindu yina. Mpe yandi ke nataka bantu ntama ya Apocalypse samu Yawu ke monikisaka: Yesu na kuvwandaka Nzambi, mpe yandi na kuvwandaka dyabulu (mpe yandi kele ya kubedisa), mpe nkembo ya Dibundu ya kusantisama yina ke na kwenda na yinzo na Nzambi, mpe kubedisa ya profete ya luvunu, mpe bawu nyonso yina ke vunaka mpe ke salaka nyonso ba ke losa bawu na dyanga ya tiya. Ya kele kukondwa ntembe ti yandi ke kangaka bawu

ntama na Yawu. Kasi, beno bambuka moyo, bisika zole yayi ke zonzila na Yinti ya Luzingu na Paladiso.

212 Ntangu yayi beto baka kaka yayi minuti mosi, mpe awa “Yinti.” Santu Jean kapu ya 6, kana beno zola kusonika yawu, Yesu tubaka, “Mu kele Dimpa ya Luzingu.” Ntangu yayi, beno bambuka moyo.

213 Ntangu yayi beto ke sadila makudi zole yayi mutindu kidimbu awa. Na yawu, kaka ntete beto kanga, awa. Ntangu yayi, na diboko ya munu ya bakala kele yinti na nsaba ya kubokila Yinti ya “Luzingu,” na diboko ya munu ya kento kele yinti na nsaba yina kele ya kubokila yinti ya “luzabu.” Bantu yikwa zaba ti Biblia ke tuba ti ya kele na Yinti ya Luzingu mpe yinti ya luzabu? Ntangu yayi, muntu zolaka zinga na Yinti yayi ya Luzingu, mpe kusimba ve yinti ya luzabu. Ya kele kieleka? Mpe mbala ya ntete yandi simbaka yawu, yandi kabukaka yandi mosi na Kiyidiki ya yandi. Yandi zimbisaka kubundana ya yandi—ya yandi na Nzambi ntangu yandi bakaka kitini ya yandi ya ntete ya luzabu. Ntangu yayi, beno banza mbote awa. Mpe beno bayina ke na kusonikaka banote ya beno, mu ke pesa ntangu samu ti beno baka yawu, samu ti mu zola ve ti beno kondwa yayi.

214 Yesu, na Santu Jean 6. Ba vwanda kunwa na yinto ya maza, mpe vwandaka losa maboko ya bawu na zulu mpe na kulakisaka kuseka kuna, ti, batata ya bawu kunwaka na Ditadi ya kimpeve, mpe nyonso yina. Yandi tubaka, “Mu kele Ditadi yina vwandaka na ntoto ya kuyuma.”

215 Mpe bawu tubaka, “Awa nge ke tuba ti nge ‘vwandaka ntete na Abraham,’ mpe nge kele ve muntu ya bamvula na zulu ya makumi tanu. Mpe nge ke tuba ti nge ‘monaka Abraham?’ Beto me zaba yawu ntangu yayi, ti, nge kele ya kulawuka, nge kele dyabulu.” Beno me mona?

216 Yandi tubaka, “Ntete Abraham kuvwanda, MU KELE.” MU KELE vwandaka na divunda na Moïse; divunda ya tiya, MU KELE. “Ntete Abraham kuvwanda, MU KELE”; ve “Mu vwandaka.”

217 Ntangu yayi, beno bantu yina ke tubaka ti bilumbu ya bimangu me luta, beno fwana sala Masonuku yango kutuba, “Mu vwandaka ya nene Mu vwandaka.” Beno me mona?

218 Ve “Mu vwandaka,” to “Mu ke vwanda”; “MU KELE,” yina kele ntangu nyonso. Yandi kele ya Seko. Mpova “MU KELE” kele ya Seko, nsungi ya bawu nyonso, ntangu nyonso, na minda sambwadi nyonso ya wolo, konso dibuundu, konso kisika, konso ntima. “MU KELE,” (ve “Mu vwandaka” to “Mu ke vwanda”) “Mu kele kaka ntangu yayi mutindu mu vwandaka ntangu nyonso.” Beno me mona? “Ntangu nyonso, MU KELE.”

219 Bawu tubaka, “Tata ya beto . . . Beto zaba ve nge. Beto zaba nge kele dyabulu.” Bawu tubaka, “Batata ya beto kudyaka mani na ntoto ya kuyuma na kati ya bamvula makumi yiya.”

220 Mpe Yesu tubaka, “Mpe bawu nyonso me kufwa.” Ya kele kieleka? “Bawu nyonso me kufwa. Kasi Mu . . .” Oh! “Mu kele Dimpa ya Luzingu yina me katuka na Nzambi na kubasikaka na Mazulu. Kana . . . Dimpa ya Luzingu. Kana muntu kudya Dimpa yayi yandi ke kufwa dyaka ve.”

221 “Muntu yayi ke pesa nzutu ya yandi, samu na kudya?” bawu tubaka, “Ntangu yayi yandi me lawuka, kieleka kaka.”

222 Dimpa ya Luzingu vwandaka Yinti ya Luzingu, kisika ba vwanda kudyaka, na nsaba ya Eden. Yandi vwandaka Yinti ya Luzingu. Ntangu yayi, kana Yinti ya Luzingu vwandaka Muntu, na yina yinti ya luzabu vwandaka muntu. Ntangu yayi beno tuba ti nyoka vwandaka ve na nkuna! Kana Luzingu me kwiza na nzila ya Bakala, lufwa me kwiza na nzila ya kento. Mbote mingi, kento vwandaka yinti ya lufwa.

223 kaka na yina—na yina yandi yayi sumunaka kento, yina yandi salaka (nyoka), kento tubaka, “Nyoka me vuna munu.” Ya kele kieleka. Nyoka ve; yandi vwandaka ya kulutila mayela na baniamama nyonso, yandi vwandaka na kati-kati ya kimpenzi mpe muntu. Nkuna ya niama lenda vukana ve na kento, ya lenda sala yawu ve; kasi muntu yayi vwandaka, yandi vwandaka kitini yankaka na yawu. Mpe Nzambi tulaka mutindu ya nsingulu na zulu ya yandi Yandi salaka yandi kutambula na kivumu ya yandi, mpe ve na makulu, mpe bakaka mukwa nyonso na kati ya yandi mpe sobisaka yawu na nyonso mutindu muntu. Science ke na kumekaka na kutimuna yawu na bilanga. Ya kele ya kubumbama na mansweki ya Nzambi, na kati-kati ya Paladiso ya Nzambi. Beno tala luzayikisu ya beno.

224 Kento butaka mwana ya yandi ya ntete yina vwandaka Caïn (Ya kele kieleka?), mwana ya Satana, mwana ya Satana. Kana ba salaka ve, wapi kisika zolaka ti—wapi kisika zolaka ti yimbi kukatuka? Kubasika na Adam yina vwandaka mwana ya Nzambi? Yandi katukaka na dyabulu, tata ya yandi. Mpe yandi kufwaka muntu; muntu ya ntete yina vwanda kufwaka bantu vwandaka dyabulu, mwana ya dyabulu.

225 Beno tala mbote yina salamaka na manima ya yawu, beno tala mbote bana ya Caïn. Kukulumuka nzila ti nsungi yina landaka, na manima ya Caïn, mosi na mosi vwandaka muntu ya science mpe bantu ya nene. Beno tanga Biblia. Ba tungaka bayinzo, ba vwandaka sala na bisengo, mpe bawu vwandaka bantu ya science. Kasi muntu nyonso yina basikaka na Seth, (Yina Abel kufwaka, kifwanukusu ya Yesu, kufwaka; mpe Abel kufwaka, mpe Seth bakaka kisika ya yandi: lufwa, luzikulu, mpe mvumbukulu.) . . . na ya yandi basikaka bantu ya bilanga ya kulemvuka, mivungi na nzila ya yawu.

226 Ntangu yayi Yesu tubaka, “Batata ya beno kudyaka mani na ntoto ya kuyuma mpe bawu nyonso me kufwa. Kasi Mu kele Dimpa yango ya Luzingu,” (Wapi Dimpa ya Luzingu? Ya Eden!) “ti muntu lendaka kudya ya Dimpa yayi mpe kufwa dyaka ve.” Ntangu yayi, Nzambi tulaka Wanzio na kizunga ya Yinti yango ya Luzingu, samu na kukeba yawu ti muntu ve zolaka simba yawu, kana ti ba zolaka kudya Yinti yango mpe kuzinga ntangu nyonso. Ya kele kieleka?

227 Samu ti, ba zolaka landila na yinti yayi mpe kufwa. Ya kele kieleka? Samu ti, ntangu nyonso yina ba zolaka kudya na yawu, bawu vwanda kufwa. Mpe kaka kieleka mutindu beno ke kufwa samu ti beno me kudya na yinti yango ya luzabu. . . Ntangu yayi, beto tala na yinti ya luzabu ntangu yayi. Beno tala yina ya salaka. Ntangu yayi beto mona yina ya salaka. Kima ya ntete, beto mona, ya . . . Mbote, beto mona yina ti bawu. . . yandi me sala tiya ya munduki. Yawu me kufwa bampangi ya beto. Ya kele kieleka, me kufwa mosi na yankaka na tiya ya munduki, na yinti ya luzabu. Kima yankaka beto salaka, oh, beto mona, beto—beto salaka tomabilu, na yinti yango ya luzabu. Yawu me kufwa kulutilla mingi na yina tiya ya munduki me sala. Oh, yinga! Ntangu yayi, beto kele na bombe ya hydrogène. Nzambi me bebisa kima mosi ve, muntu yandi mosi me bebisa na luzabu ya yandi.

228 Kasi nyonso yina kele ya Nzambi, Nzambi ke vumbula yawu dyaka; Nzambi ke zimbisaka kima mosi ve. Yesu tubaka yawu, ya kele kieleka, “Yandi yina ke kudya Dimpa yayi kele na Luzingu ya Kukonda nsuka, mpe Mu ke vumbula yandi dyaka na kilumbu ya nsuka.” Ya kele nsilulu ya Yandi. Ntangu yayi, Nzambi. . .

229 Ba kele ntama na ntwala, na kudyaka na yinti ya luzabu mpe na kufwaka. Kasi ntangu kaka bawu zolaka kuzwa Yinti yayi, ba zolaka zinga kukondwa nsuka.

230 Na yawu ntangu yayi na kisika ya Wanzio na ngaanda kuna na kubumbaka bawu ntama na Yinti yayi, ya kele na ngaanda kuna na kunataka bawu na Yinti yayi; bawanzio ya mabuundu, mabuundu sambwadi, na kuvutulaka bawu na Nkumbu ya Yesu Klisto yina kele Yinti ya Luzingu yina kele ya kutelama na Paladiso ya Nzambi. Fiu! Oh! Mu banza ti beno me bakula yawu. Yinti ya Luzingu ya kutelama na Paladiso ya Nzambi ti beno lendaka kota na Yandi mpe kukuma mwana ya bakala mpe mwana ya kento ya Nzambi mpe kuzinga kukondwa nsuka. “Yandi yina ke kuwa Bandinga ya Munu mpe ke kwikila na Yandi yina fidisaka Munu kele na Luzingu ya Kukonda nsuka, mpe ke kota ata mbala ve na lufundusu kasi me luta lufwa na Luzingu.”

231 Mpangi ya bakala, mpangi ya kento, ntangu yayi mu. . . mu. . . Kieleka, mu. . . mu—mu me zenga beno, me nyongisa beno. Mu—mu me zola ve kusala yawu mutindu yina. Beno me mona? Nzambi zaba yawu, kasi mu fwana sala yawu mutindu



yayi samu ti beno kumona kisika beto kele. Mu banza ve ti beto ke vwanda ntangu mingi. Mu ke na kumekaka ve na kukatula beno na Buklisto samu ti beno kele ya organisation. Ya kele yawu ve. Bantu kele bayina me kubwila mambu. Ba zaba ve kima ya kusala; nyonso bibuti ya bawu ntangu nyonso salaka kele kuvwanda ya dibuundu mpe nyonso.

232 Kasi, mpangi, kima mosi ntete beto kwenda, beno bika munu kupesa masonuku mosi dyaka yayi. Profete ke tuba . . . Beno ke kwikila na baprofete? Biblia ke tuba na kuwa bawu. Profete ke tuba, “Ya ke kwiza ntangu ti ya ke vwanda na ata kilumbu to mpimpa ve, kasi ya ke vwanda mutindu kilumbu ya boma. Kasi na ntangu ya mpimpa, kaka ntete mwini kulala, ya ke vwanda na Nsemo.” Ya kele kieleka?

233 Ntangu yayi beno tala yina beto me kuzwa. Ntangu yayi, beto tala kaka. Wapi mutindu mwini . . . Wapi kisika mwini ke telamaka, landila géographie? Na esete. Ya kele kieleka? Ya ke lalaka na wesete. Kana mu vwandaka . . . Mu ke baka karte mbasi na nkokila mpe ke talisa. Ntangu Mpeve-Santu kubwaka na Jérusalem, Yawu salaka kizizi ya nana ya kulunga, nzila ya Yawu. Yawu sabukaka kaka na kukwendaka na zulu na Irelande, mbala mosi me vutuka na manima, na kubalukaka, mpe me kwiza na Cote Weste, mpe kubwaka kaka mbala mosi dyaka; kizizi ya kulunga ya nana kisika Nsangu ya mbote kwendaka. Ntangu yayi, civilisation me zyeta na mwini. Bantu yikwa zaba yawu? Ba me tubaka na beno yawu mpe beno zaba yawu. Civilisation ya kulutula ntama yina kele na beto kele ya Chine, mpe na manima ya yawu me sabuka na esete. Mpe ntangu Mpeve-Santu, m-w-i-n-i ve [Na kingelezi S-u-n—Mu.], kasi M-w-a-n-a [S-o-n] . . .

234 Ntangu mwini, m-w-i-n-i, ke bandaka na kulezima na mbungi mpe dibungi ya mpimpa, ata kisika nkuna kele, ya ke zinga; samu ti luzingu nyonso ya bayinti ke zingaka na nzila ya mwini. Beto zaba yawu. Beno lendaka dukula kaka sima na ndambu ya matiti, mpe ti printemps yina ke landa, kisika matiti ya kulutula nene kele? Kaka na nsuka ya sima. Samu na yinki? Ya kele luzingu yango na yisi kuna, beno lenda bumba luzingu ya kieleka ve. Luzingu yango ya fyoti, ntangu kaka ya ke zaba ti mwini ke na kulezimaka na lweka kuna, yawu ke sala nzila ya yawu pene ya bloc ya bayinzo, na kubalukaka na yisi ya sima yina tii yawu ke lenda kulutisa yintu ya yawu mbala mosi na mupepe mpe kukwenda kembila Nzambi.

235 Beno lenda bumba Luzingu ve. Ya kele kieleka, LUZINGU. Ntangu beno me butama dyaka beno lenda bumba Yawu ve. Kima fwana boka ntangu beno kele na Luzingu.

236 Ntangu yayi, bima nyonso yina me kufwa ntangu yayi, mpe bankuna ya fyoti me pasuka, pulpe me tsyamuka, mpe yawu me kufwa, kasi luzingu kele dyaka kuna. Ntangu yayi, ntangu

mwini ke bandaka na kulezima na printemps, bafololo ya fyoti ke basika, mpe nyonso ke telemisa yintu ya yawu dyaka (kuna na yisi ya yina bikanaka, kuna na yisi ya kisinza, kuna na yisi ya matadi), yawu ke vumbuka dyaka, mpe ke zinga dyaka. Ya kele kieleka? Samu ti m-w-i-n-i ke na kulezimaka.

237 Ntangu yayi, kilumbu M-w-a-n-a ke lezima, yina kele Mfumu ya Luzingu ya Kukonda nsuka, mpe nyonso yina butamaka na Yandi samu na Luzingu ya Kukonda nsuka, Yandi tubaka, “Mu ke vumbula yawu na kilumbu ya nsuka.” Beno ke mona yina mu ke zola kutuba? Ba ke vumbula Luzingu ya Kukonda nsuka na bilumbu ya nsuka. Kana ba zikaka beno na mubu, to ba nyengisaka nzutu ya beto mpe ti ba tsyamunaka yawu na mipepe yiya ya ntoto, Nzambi ke vumbula yawu na kilumbu ya nsuka. Kana beno fwana fulusa kivumu ya nkosi yina kele na nsatu, to—to kukota na mabulu ya tiya yina ke basisa bima nyonso kumi na sambanu ya pitiloyi mpe ya minda ya yinza mpe nyonso ya beno, Nzambi ke vumbula yawu. “Bansuki kaka ya beno kele ya kutanga.” Amen! Nzambi ke vumbula yawu!

238 Ntangu yayi, beno tala awa. Ntangu yayi, kana muntu nyonso kufwaka na nzila ya kento, na yina muntu nyonso ke zinga na nzila ya Bakala. Na kuvwandaka na mutindu ya luzingu yina ke katuka na kento, beno zaba ti beno ke kufwa. Ya kele ve na nzila na ngaanda ya yawu, beno ke kufwa. Mpe kieleka kaka mutindu beno ke baka Yawu, beno ke zinga; ya kele ve na nzila na ngaanda ya yawu, beno fwana zinga. Amen! Kana yawu ke basisaka lufwa ya kieleka, Yayi ke basisaka Luzingu ya kieleka. Ya kele kaka mutindu beno lenda kuzwa yawu, ya kele kuzwa Luzingu.

239 Ntangu yayi, profete ke tuba, ti, “Ya ke vwanda na Nsemo na ntangu ya mpimpa.” Ntangu yayi beno tala. Yandi tubaka ya ke vwanda na kilumbu yina ke vwanda ya boma, ba ke bokila yawu ve kilumbu to mpimpa. Ya kele mutindu kilumbu ya matuti, ya dibungi, ya madidi, kasi dyaka Mwana ke pesa Nsemo. Ntama na zulu ya dibungi yango mpe matuti mpe nyonso, Mwana ke pesa Nsemo. Yandi ke pesa Nsemo ya kulunga yina beno lenda tambula, mpe beno lenda mona mutindu ya kukwenda na kizunga, mpe nyonso, kasi dyaka ya—ya ke lezima ve, kilumbu ya kitoko. Beno me mona? Ntangu yayi, na mpasi kima lenda zinga na kilumbu yango.

240 Kana beno kuna kima na yisi kisika mwini ke bula yawu ve, yawu ke kanga luzingu. Ya kele kieleka ve? Beno bantu ya bilanga zaba yawu. Beno tula disangu na zulu ya mpewo gto kisika mosi, beno tala mbote, yawu ke kanga yawu luzingu. Fred, nge fwana zaba yawu na nzila ya blé ya nge. Beno ke tula yawu na ngaanda kuna, mpe kana beno vwanda na été ya yimpi, oh, madidi mpe ya mvula, yawu ke kanga yawu luzingu.

241 Mbote, ya kele yina kele dyambu na dibuundu nzila nyonso ya bansungi yayi, yawu luzingu me vwanda ya kukanga. Yawu luzingu me vwanda ya kukanga na ba-dénomination, “Beno tula nkumbu na zulu ya buku. Beto me kuzwa mingi Nsemo na kuzaba ti ya kele na Nzambi.” Mu kele na kyese samu na yawu. “Beto me kuzwa mingi ya Nsemo na kuzaba ti ya kele na Klisto, ya kele na lufundusu ke na kukwiza. Beto kuzwaka Nsemo; na yawu beto ke tula bankumbu ya beto na babuku, beto pesanaka maboko na pasteur, nyonso yina, mpe salaka yawu.” Mbote mingi, kasi ntangu yayi ya kele ntangu ya mpimpa.

242 Ntangu yayi, kindele me katuka esete na wesete, mpe ntangu yayi beto kele na Cote Wesete. Beto lenda kwenda ntama ve; kana beto sabuka, beto ke vutuka dyaka na Esete. Beto lenda kwenda ntama ve, beto kele na Cote Wesete.

243 Ntangu yayi, Biblia ke tuba, “Na ntangu ya Mpimpa Nsemo ke kwiza.” Ntangu yayi, wapi mutindu ya mwini yina ke lezima na ntangu ya mpimpa? Ya kele mwini yankaka yina telamaka na suka? Ya kele mwini mosi. Ya kele kieleka? Mbote, na yina, yinki Nzambi silaka? Ntangu yayi beto ke kuma na yayi, beno simba yawu, kaka awa na nsungi yayi. Biblia ke tuba yawu, mu ke lakisa yawu, bansungi ya dibuundu yayi, na yina beto ke landila, ti, “Na ntangu ya mpimpa ya ke kwiza Nsemo ke tsyamuka na Wesete yina ke vutula dyaka Mwini ya Ludedomo na kubeluka na mapapu ya Yandi. Mpe mutindu mosi ya bidimbu mpe mutindu mosi ya mambu ya ngitukulu yina salamaka ntama awa na Esete ke salama dyaka awa na Wesete, na kutsyamuka yankaka ya Mpeve-Santu na kilumbu ya nsuka.”

Ya ke vwanda na Nsemo na ntangu ya mpimpa,  
 Beno ke mona kieleka nzila ya Nkembo;  
 Na nzila yango ya maza, Yawu kele Nsemo  
 bubu yayi,  
 Luzikulu na Nkumbu ya ntalu ya Yesu.  
 Ntwenya mpe kuluntu, beno balula ntima  
 samu na masumu ya beno nyonso,  
 Mpeve-Santu kieleka ke kota;  
 Bansemo ya mpimpa me kwiza,  
 Ya kele dyambu ti Nzambi mpe Klisto kele  
 Mosi.

Oh, ya ke vwanda na Nsemo na ntangu ya  
 mpimpa,  
 Beno ke mona kieleka nzila yango ya Nkembo;  
 Na nzila ya maza yayi kele Nsemo bubu yayi,  
 Luzikulu na Nkumbu ya ntalu ya Yesu.  
 Ntwenya mpe kuluntu, beno balula ntima  
 samu na masumu ya beno nyonso,  
 Mpeve-Santu kieleka ke kota;  
 Bansemo yango ya mpimpa me kwiza,

244 Kima mutindu mosi yina Pierre tubaka, “Ti ya vwanda ya kuzabana na beno, ti Nzambi me sala Yesu mosi yayi, yina beno komaka na kulunsi, Mfumu mpe Klisto. Beno balula ntima, mosi na mosi ya beno” yandi tubaka, “mpe beno botama na Nkumbu ya Yesu Klisto samu na lemvo ya masumu ya beno.”

245 Beno bika munu kutuba kima mosi na beno. Mutindu mu vwandaka zonzila kilumbu yankaka yina na zulu ya *mukanda ya dokotolo*. Bantu ke zolaka ve kubaka mukanda ya dokotolo. Kana yandi kele na nkisi yina ke belusa kimbevo ya beno, mpe beno kondwa dyaka . . . beno manga na kubaka yawu, ya kele ve foti ya dokotolo ti beno kufwa. Ve, tata. Ya kele foti ya beno, samu ti beno me manga na kubaka yawu.

246 Mpe ntangu yayi, kana dokotolo sonika mukanda mpe yandi . . . mpe beno nata mukanda yango na falamasien ya bandi, mpe ti yandi kotisa kuna yina zolaka vwanda kuna ve, yawu ke kufwa beno, mpe. Ya kele kieleka? Dokotolo yina longokaka yawu tii yandi zabaka ti mingi ya mukanda yina kele ndikila, samu na kufwa ba-microbe yango yina kele na kati ya nzutu ya beno; mpe ya kele na nkisi ya kulunga na kati kuna samu na kukanga nkasa yina samu na kufwa beno ve. Mpe ya fwana vwanda na kitezo mosi. Kana beno tula mingi ya nkisi, ya ke sadisa mbevo ve; kutula nkasa mingi, ya ke kufwa yandi. Ya fwana vwanda na kitezo mosi.

247 Kyuvu vwandaka, “Ya kele ve na nkisi na Galaad? Ya kele ve na munganga kuna?” tubaka profete. “Na yina samu na yinki kimbevo ya mwana ya Munu ya kento ke beluka ve.” Wapi dyambu kele na dibuundu? Samu na yinki beto kele na mabuundu mingi ya kubela? Samu ti beto kuzwaka bafalamasien mosi ya babandi yina vwandaka pesa Mukanda ya yimbi. Ya kele kieleka. Yandi ata mbala mosi ve tubaka, “Tata, Mwana, Mpeve-Santu.” Yandi . . .

248 Yinki Mukanda vwandaka tuba? Beno tala Pierre. Bantu yikwa zaba ti yandi vwandaka na bafungula ya Kimfumu? Yesu tubaka yawu. Yinki Yandi tubaka? Na bampova yankaka, yandi kele na bike ya ntinta samu na Mukanda.

249 Ntangu bawu kuwaka makelele nyonso yayi na ngaanda, (Ba vwandaka tuba na ngolo, vwandaka looka, vwandaka zonga na bandinga, mpe vwandaka kuzwa ntangu ya mbote.) mpe bawu tubaka, “Bantu yayi kele ya kifuluka na vinu ya malu-malu.”

250 Pierre tubaka, “Bayayi kele ve ya kifuluka na vinu ya malu-malu, mutindu beno ke banza, na kumonaka ya kele ngunga ya yivwa ya kilumbu. Kasi yayi kele mambu yina tubaka profete Joel, ‘Ya ke salama na kilumbu ya nsuka,’ tubaka Nzambi, ‘Mu ke tsyamuna Mpeve ya Munu na zulu ya nsuni nyonso. Bana ya beno ya babakala mpe bana ya beno ya bakento ke pesa baprofesi, mpe na zulu ya bisadi ya munu ya bakento mpe misadi ya munu ya bakento Mu ke tsyamuna ya Munu Mpeve, mpe bawu ke pesa

baprofesi. Mpe Mu ke talisa bidimbu na zulu ya mazulu, mpe na yisi ya ntoto; tiya, mpe mulinga, mpe mupepe. Mpe ya ke salama ti muntu nyonso yina ke bokila na Nkumbu ya Mfumu ke ve . . . ke kuzwa mpulusu.”

<sup>251</sup> Mpe na lweka yankaka yandi tubaka na David, yandi tubaka, “Tata David monaka yawu na ntete, mpe yandi tubaka, ‘Mpe nsuni ya munu ke pema na kivuvu samu ti Yandi ke bika ve moyo ya Munu na difelo, to dyaka Yandi ke pesa ve muswa na Muntu ya Yandi ya Santu na kumona kupola.’ Beno bika munu kutuba na beno pwelele, bankundi, na nkooko David, Yandi kele ya kufwa mpe ya kuzika, mpe ntoni ya yandi kele na beto na kilumbu yayi. Beno me mona, kasi yandi, na kuvwandaka profete, monaka mvumbukulu ya Klisto. Ti yawu kuvwanda ya kuzabana na beno, ti Yesu yayi, yina beno komaka na kulunsi na maboko ya yimbi, Nzambi me sala Yandi Mfumu mpe Klisto.”

<sup>252</sup> Ntangu bawu kuwaka yayi, bawu vwandaka na mpasi mingi na ntima ya bawu, mpe tubaka, “Bampangi,” to, “Dokotolo Simon Pierre, sonikila beto Mukanda. Wapi mutindu beto lendaka kuzwa Yayi? Beto zola nkisi samu na disumu.” Oh!

<sup>253</sup> Ntangu yayi beno tala mbote yandi, yinki yandi tubaka. Ntangu yayi beno ke tala kisika mabuundu yayi katukaka na nzila. Yandi tubaka, “Beno vingila fyoti! Mu ke sonika Mukanda, mpe ya ke vwanda Mukanda ya Seko. Ya ke vwanda samu na beno, mpe samu na bana ya beno, mpe na bawu yina kele ntama, mpe mutindu mingi Mfumu Nzambi ya beto ke bokila.”

<sup>254</sup> Yinki yandi tubaka? Wapi mutindu yandi yidikaka yawu? Mutindu Katolika kele na yawu? Mutindu ba-Baptiste kele na yawu? Mutindu ba-Méthodiste kele na yawu? Mosi na mosi ya bawu me bwela kima to me katula kima na Yawu. Mutindu ba-Pentecotiste? Bawu bwelaka to katulaka. Kasi yinki yandi tubaka? “Beno balula ntima, mosi na mosi ya beno, mpe beno botama na Nkumbu ya Yesu Klisto samu na lemvo ya masumu ya beno, mpe beno ke kuzwa dikabu ya Mpeve-Santu.” Lutumu ya Seko! “Ya kele samu na beno, mpe samu na bana ya beno; yayi ke vwanda nzila nyonso na konso nsungi ya dibuundu, beno pesa Yawu na mosi na mosi ya bawu.”

<sup>255</sup> O Nzambi, vedisa maboko ya munu. Vedisa ntima ya munu, Mfumu. Ti . . . Kana ya ke baka konso nkundi kele na munu, bika mu pesa Lutumu mutindu Dokotolo tubaka na kupesa Yawu.

<sup>256</sup> Ya kele samu na yina beno kele na mabuundu mingi ya kufwa, bamambeke mingi ya kufwa. Beno ke na kubwelaka nkisi, mpe ke na kukatulaka mingi ya Yawu tii Lutumu kele dyaka yawu mosi ve, ya ke belusa mpe kima ve; kupesana maboko, mpe kukuma ya mabuundu, mpe kumwangisa mwa maza. Oh, kyadi, ya kele Lutumu ve, ya kele lufwa. Kana beno ke zola Luzingu, mpe ke zola Mpeve-Santu, beno landa yina Nzambi me tuba. Beno baka Lutumu! Ya kele kieleka mutindu Yandi tubaka,

“Beno bwela na Yawu ve to beno katula na Yawu ve.” Na yina awa me kwiza Luzayikisu kaka na zulu mpe ke tuba, “Muntu nyonso yina ke katula to ke bwela, mutindu mosi ba ke katula (ndambu ya yandi) na Buku ya Luzingu.” Oh, la la, yina kele Dokotolo ya *ngudi*. Oh, Mu zola Yandi. Beno ve?

<sup>257</sup> Oh, na nsungi ya nene yango, ya Nsungi ya Ephèse, ntangu hérésie yayi kaka bandaka na kukota na malembe, samu na kusala ba-organisation. Mpe ba-pasteur mpe badiakre. . . to badiakre ve, kasi pasteur. . . ba-pasteur ve, kasi ba-Cardinal, ba-bishop, ba-pape, mikengi ya mabuundu, na kutubaka Mpeve-Santu, na kutubaka na Dibuundu, “Ntangu yayi, beno lendaka ve kuzwa yawu na kati awa!” Nani kele mfumu, na mutindu nionso?

<sup>258</sup> Ba lombaka yawu na Piierre kilumbu mosi. Bawu tubaka, “Nge lendaka longa dyaka ve na Nkumbu ya Yesu. Nge lendaka longa kana nge zola, kasi na Nkumbu ya Yesu.” Oh, dyabulu ke yinaka Nkumbu yango!

<sup>259</sup> Pierre tubaka, “Ya kele ya kulunga samu na munu na. . .” Biblia ke tuba, “Pierre na kuvwandaka ya kufuluka na. . .” (dénomination?) Oh, ah, “. . . na Mpeve-Santu.” Yandi tubaka, “Beno vingila, mu ke kwenda mona surveillant général, samu na kumona yinki yandi ke tuba na munu na kusala samu na Yayi.”

<sup>260</sup> Beno bika mu tuba na beno. Beno zabaka ti ba-Assemblée de Dieu kele na psychiatre samu na kufundisa, mpe kukwenda nata ba-missionnaire ya bawu na ntuala ya psychiatre, samu na kumona kana muntu yina kele ya kulunga na yintu na kuvwanda missionnaire? Ba-Pentecote ya ba-Assemblée de Dieu. Bantu yikwa me kuwaka ntete yawu? Kieleka, yawu nyonso me zabana, muntu nyonso zaba. Kieleka. Nani fwana tala missionnaire mpe kele zuzi, psychiatre to Mpeve-Santu? Beno me mona, ya kele yina beno me kuzwa, na kuzwaka muntu. Beno me mona, ba-théorie yina muntu me sala, malongi yina muntu me sala. Beno vingila tii beto ke kuma na nsungi yango ya Pantekote! Nzambi ke nyengisa kaka kima yango kieleka mutindu yinza. Inga, tata. Yinga, kieleka. Mpe beno ke mona yawu kusimba tiya nzila nyonso. Uh, hum. Kieleka.

<sup>261</sup> Kasi kilumbu mosi ya nkembo Yandi ke kwiza. Mpe beno bambuka moyo, beno kuwa, ya kele na bansungi sambwadi ya dibuundu. Ya kele kieleka? Ya kele na bansungi sambwadi ya dibuundu. Mpe beno ke bambuka moyo ntangu bawu basikaka na kukutana Kento ya makwela—Bakala ya makwela, bayankaka kubwaka na kulala na kyelola ya ntete (Ya kele kieleka?), kyelola ya zole, (Kieleka, kufwaka ve—ve, kubwaka na kulala.) na kyelola ya tatu, na kyelola ya yiya, na kyelola tatu, na kuyelola ya sambanu; mpe na kuyelola ya sambwadi makelele kuwakanaka, “Beno tala, Bakala ya makwela ke na kwiza! Beno

basika na kukutana Yandi!” Yinki salamaka? Bamwense nyonso yango yina vwandaka ya kulala, kuvumbukaka.

Na suka yango ya kulezima mpe matuti ntangu mafwa na Klisto ke telama, (Ya matuti, Bansemo ya mpimpa ke lezima.)

Mpe suka ya Seko ke tana, ke ngenga mpe kitoko;

Ntangu baya kuvuuka na zulu ya ntoto ke vukana na bayinzo ya bawu na manima ya dizulu,

Ntangu ba ke baka liste na zulu kuna, mu ke vwanda kuna.

Ntangu ba ke baka liste na zulu kuna,

Ntangu ba ke baka liste na zulu kuna,

Ntangu ba ke baka liste na zulu kuna,

Ntangu ba ke baka liste na zulu kuna, mu ke vwanda kuna.

Bika beto sala samu na Mfumu kubanda bwisi me kudya tii kulala ya mwini,

Beto zonzilaka na luzolo ya Yandi ya ngitukulu mpe ya kukeba;

Kuna ntangu luzingu nyonso me suka, mpe kisalu ya beto na zulu ya ntoto me salama,

Ntangu ba ke baka liste na zulu kuna, . . .

Mwana nyonso ya Nzambi telemisa maboko ntangu yayi:

Ntangu ba ke baka liste na zulu kuna,

Ntangu ba ke baka liste na zulu kuna,

Ntangu ba ke baka liste na zulu kuna,

Ntangu ba ke baka liste na zulu kuna, mu ke vwanda kuna. (Oh!)

Na kiese ntama ve,

Beto ke kutana na Yinsi yina ya kitoko;

Na kiese ntama ve,

Beto ke kutana na Yinsi yina ya kitoko.

<sup>262</sup> Beno ke zolaka bankunga ya ntama ya dibuundu? Oh!

Na Tata ya beto ya lutondo kuna na zulu,

Beto ke pesa makabu mpe lukumu,

Samu na dikabu ya nkembo ya zola na Yandi,

Mpe balusakumunu yina kele ya byeka kilumbu ya beto.

Na kiese ntama ve,

Beto ke kutana na Yinsi yina ya kitoko;

Na kiese ntama ve,

Beto ke kutana na Yinsi yina ya kitoko.

Ntangu yayi beno pesana maboko na muntu na kizunga ya beno, kizunga nyonso mutindu yina. Ya kele mbote.

. . . na kiese ntama ve,

Beno tuba, “Mu ke kutana beno mpangi.”

Beto ke kutana na Yinsi yina ya kitoko;

Na kiese ntama ve,

Beto ke kutana na Yinsi yina ya kitoko.

Beto ke yimba na Yinsi yina ya kitoko,

Nkunga ya kitoko . . .

Muntu nyonso kuyimba yawu ntangu yayi.

Mpe mpeve ya beto ke vwanda dyaka ve na  
mawa,

Kuvumuna ve samu na balusakumunu ya  
kupema.

Muntu nyonso, na maboko ya beno na zulu:

Na kiese ntama ve,

Oh, beto ke kutana na Yinsi yina ya kitoko;

Na kiese ntama ve,

Beto ke kutana na Yinsi yina ya kitoko.

<sup>263</sup> Na bayintu ya beto ya kukulumusa ntangu yayi, beto tuba yayi:

Mfumu Yesu, Mu zola Nge. Mu ke kwikila ti Yesu Klisto kele Mwana ya Nzambi, Nzambi zabanaka na nsuni samu na kukatula disumu ya munu. Mu ke sala kivuvu ve na mangolo ya munu, Mu kele na ata mosi ve, kasi mu kele kieleka na kusalaka kivuvu na mangolo ya Yesu Klisto yina kele Mvulusi ya munu, Nzambi ya munu, Ntinu ya munu. Mu zola Yandi. Amen.

<sup>264</sup> Mbasi na nkokila na ngunga ya sambwadi, kana Mfumu zola, beto ke baka dibuundu ya Smyrne.

Na kiese . . .

Na bayintu ya beto ya kukulumusa ntangu yayi.

(Oh, ntama ve!)

Beto ke kutana na Yinsi yina ya kitoko; (Ntama  
ve!)

Na kiese ntama ve,

Beto ke kutana na Yinsi yina ya kitoko.

Ntangu yayi na malembe nyonso, muntu nyonso, na malembe:

Oh, na Tata ya beto ya mbote na zulu,

Beto ke pesa makabu mpe lukumu,

Samu na dikabu ya nkembo ya zola ya  
Yandi . . .





*NSUNGI YA DIBUUNDU YA EPHÈSE* KNG60-1205  
(The Ephesian Church Age)

BANDANDANI YA LUZAYIKISU YA YESU KLISTO

Nsangu yayi ya Mpangi William Marrion Branham, kulongamaka na Kingelesi, na Kilumbu ya ntete na nkokila, na kilumbu ya 5 ya Ngonda ya kumi na zole, na mvula 1960, na Branham Tabernacle na Jeffersonville, Indiana, U.S.A., yina bakamaka na bande manietiki mpe basisamaka na muvimba nionso na buku na Kingelesi. Lubangulu yayi na Kikongo basisamaka na buku mpe ba kabulaka yawu na Voice Of God Recordings.

KIKONGO-KITUBA

©2022 VGR, ALL RIGHTS RESERVED

**VOICE OF GOD RECORDINGS**  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kidadilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutila mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutila mingi to samu na yina me tadila bisadulu, beno sonikila:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)